

四庫全書

子部

欽定四庫全書

子部
說略
目錄
卷二

詳校官中書臣孫球

主事臣祁韻士覆勘

總校官庶吉士臣何思鈞

校對官中書臣楊世綸

膠錄監生臣周元梓

欽定四庫全書

子部十一

說畧目錄

類書類

卷一

象緯

卷二

方輿上

卷三

方輿下

卷四

時序

卷五

人紀

卷六

官儀

卷七

史別上

卷八

史別中

卷九

史別下

卷十

禮叢

卷十一

律支

卷十二

典述上

卷十三

典述中

卷十四

典述下

卷十五

字學

卷十六

書畫

卷十七

李法

卷十八

冥契上

卷十九

冥契下

卷二十

居室

卷二十一

服飾

卷二十二

工考上

卷二十三

工考下

卷二十四

諧志

卷二十五

食憲

卷二十六

珍格

卷二十七

丹牋上

卷二十八

舟牋下

卷二十九

蟲注上

卷三十

蟲注下

臣等謹案說畧三十卷明顧起元撰起元字

太初江寧人萬曆戊戌進士官至吏部右侍

郎謚文莊明史藝文志載說畧六十卷考起
元自序全書實止三十卷蓋志偶悞也其書
雜采說部件繫條列頗與曾慥類說陶宗儀
說郛相近故明史收入小說家類然詳考體
例其分門排比編次之法實同類書但類書
隸事此則纂言耳雖其中旁及二氏及參以
怪異詭瑣之事不免駁襍特明代坊行類書
最多大抵剽竊鉅訂無資實用起元學問較

諸家為淹貫故所作尚有體裁其史別典述
諸門尤有益於攷證裒輯彙粹之功良亦未
可盡泯也乾隆四十三年五月恭校上

總纂官

臣

紀昀

臣

陸錫熊

臣

孫士毅

總校

官

臣

陸

費

墀

說略原序

昔在甲午乙未之間予端居多暇案上度說部書數十種隨手取一卷諷之以代憲蘇陶日月遇有可備攷質者苦其性善忘輒取赫蹠識之以類黏尺二鉅冊上時自哂其有掌錄而無舌學已離而為二十卷名曰說略藏諸笥中中間曾一屬友人半堃李君糾其錯亂浙門張君釐其點畫凡再易草始克成編乙巳自京師請告歸舟敗于南陽之決河而此書亡矣舊藁尚存張君

處會其人又物故予惋惜者久之既而其家從敝筭中
檢以歸予予頗有珠還之喜因念門類差分涉獵未廣
更欲釐正而附益焉而病復未果僅最為三十卷錄而
存之或謂就一類之中多有缺遺就數類之中多非關
要或按或引可有可亡重言雖連犴而無傷瑣事實荒
唐而莫辨愛奇自可詒怪何為予亦輒然自疑不能定
也兩弟時從旁慫恿梓于家塾以示兒輩自顧無力荏苒
數年頃新安祕書吳君德聚博古通微耽耆佚典偶過

金陵訪予探得數卷讀而好之請事剞劂因念曩時排
繡之勞與漂沒之感舉以付焉用成其義先是文學朱
君君器見而心賞捐貲為之繕寫刻既竣迺并記其所
繇如此嗟乎世之閱覽博物君子且囊括昔之為海為
鄢者以大其畜何以略為顧有如予之好臆而善忘者
時探而諷之亦可藉以備丹陽之鈔補河東之篋雖六
藝鍵鈴九流津涉原原本本之論未極于斯至于考驗
是非綜校名實兼資前識用廣異聞古今賢詰之用心

往往可以概見是在覽者擇之而已若曰斷截弘美組
織纖細則予豈敢避偃鼠飲河之誚哉萬厯癸丑嘉平
江寧顧起元書於遯園之懶真草堂

欽定四庫全書

說畧卷一

明 顧起元 撰

象緯

廣雅云天圍南北二億三萬三千五百里七十五步東
西減短四步周六億十萬七百里二十五步從地至天
一億一萬六千七百八十七里下度地厚與天高等二
十八宿間相距積一百七萬九百一十三里段成式酉
陽雜俎玉格云天地相去四十萬九千里四方相去萬

萬九千里貝編又云色界天下石經十萬八千三百八
十三年方至地晉天文志云地上去天八萬一千三百
餘里後漢地理志注周天積一百七萬九百一十三里
徑三十五萬六千九百七十一里張衡靈憲云八極之
維經二億三萬二千三百里南北短減千里東西廣增
千里自地至天半於八極地之深亦如之或曰地廣東
西二萬八千里五億十萬九千八百八步南北二萬六
千里河圖括地象曰東西二億三萬三千里南北二億

三萬一千五百里夏禹所治四海內東西二萬三千里
南北二萬六千里淮南子言四海之內東西二萬八千
里南北二萬六千里水道八千里東極至西極二億三
萬三千五百里七十五步北極至南極二億三萬三千
五百里七十五步管子言地四極出水者八千里受水
者八千里或曰地厚七萬二千二百里下至泉壤第一
壘上至星天九萬七千二百里下至九幽洞淵上至星
天一千二百一十八萬里

四時天名春為蒼天夏為昊天秋為旻天冬為上天見
爾雅九方天名東方皞天東南方陽天南方赤天西南
方朱天西方成天西北方幽天北方玄天東北方變天
中央鈞天見廣雅中央鈞天東方蒼天東北變天北方
玄天西北方幽天西方昊天西南方朱天南方炎天東
南方陽天見淮南子

釋氏所載諸天有四天王天帝釋天夜摩天兜率陀天
化樂天他化自在天梵衆天梵輔天大梵天少光天無

量光天光音天少淨天無量淨天徧淨天福生天福壽
天廣果天無想天無煩天無熱天善見天善現天色究
竟天無邊空處天無邊識處天無所有處天非想非非
想處天日月星宿天常憍天持鬘天堅首天見因本經
又忉利天忼摩天摩身天梵迦三天果實三天無造天
大善天空處天識處天不用處天有想無想天見阿含
經

道家所載諸天有太黃皇曾天大明玉完天清明何童

天玄胎平育天元明文舉天七耀摩夷天虛無越衡天
太極濛翳天赤明和陽天玄明恭華天曜明宗飄天竺
落皇笏天虛明堂曜天觀明端靜天玄明恭慶天太煥
極瑤天元載孔昇天太安皇崖天顯定極風天始皇孝
芒天太皇翁重天無思江由天上揲阮樂天無極曇誓
天皓庭霄度天淵通元洞天翰寵妙成天秀樂禁上天
無上常融天玉隆騰勝天龍變梵度天平育賈奕天又
大赤天無上大羅天見元始度人經又無景無色鬱單

無量天無形清微天無精波羅摩褥天色水無量億羅
天無極洞清上上禪善無量壽天玄微自然上虛禹餘
天玄清上炁那首約淨天梵行上清炁稽那遏淨天無
窮洞虛極上須延天玄梵玉虛無精無羅迦淨明天無
玄元達上靈赤天大梵元炁離和天無極上虛玉空玄
洞寂然天梵無色上真炁潘羅玄妙天飛梵行真上玄
岑謾福德天雲梵流精中元近懋際淳天玄上洞極無
崖不驕樂天大梵玄天元精答起近蔭天行梵紫虛上

元首帶快見天虛梵上清化靈須陀結愛天上極無景
洞微化應聲天大梵九玄中元阿給道德天行梵元清
下靈炁須遠天極梵洞微九靈炁須帶阿那天無名至
極洞微梵寶天微梵玄天炁帶扇給道德天虛梵天炁
蟬然識慧天空梵中天續元伊擅天太極無崖紫虛洞
幽梵迦摩夷天錄梵自然識慧入天玄梵大行無景無
所念慧天雲梵上行維先何擅天無色玄清洞微波黎
答耆天洞微玄上梵炁阿竭舍那天玄上祿梵滅然天

極色上行梵泥維先若那天見道經

日名朱明一名靈耀一名東君一名大明一名陽鳥見
廣雅一名翔陽見木華海賦方諸山真天呼日為圓羅
耀外國人呼日為濯羅耀見真誥義和者帝俊之妻是
生十日浴日于甘泉見山海經鬱儀奔日之仙鬱儀亦
文與日同居見雞跖集日中有三足鳥名踆鳥見漢天
文志及五經通義日出暘谷浴于咸池拂于扶桑是謂
晨明登于扶桑是謂朏明至于曲阿是謂朝明臨于曾

泉是謂早食次于桑野是謂晏食臻于衡陽是謂禺中
對于昆吾是謂正中靡于鳥次是謂小遷至于悲谷是
謂晡時回于女紀是謂大遷經于泉隅是謂高春頓于
連石是謂下春爰息六螭是謂懸車薄于虞泉是謂黃
昏淪于蒙谷是謂定昏日入崦嵫經細柳入虞泉之地
蒙谷之浦垂景在樹端謂之桑榆見淮南子占日法氣
形直微起在日上為戴青赤氣抱日上小如冠為冠青
赤氣小而交于日下為纓青赤氣小而圓交日左右為

組青赤氣如小半暈狀在日上為負皆有喜青赤氣長而斜倚日旁為戟青赤氣圓而小在日左右為珥有暈日旁如半環向日為抱背日為背青赤氣如帶在日四旁為璫青赤氣長而立日旁為直氣成形在日四方為提青赤氣橫在日上下為格日下有黃氣三重名曰承福人主有喜且得地青白氣如履在日下曰履見晉天文志

月中嫦娥之說學齋占畢嘗論其妄云漢志黃帝使羲

和占日常儀占月周官注云儀俄二字古皆音娥毛詩
實惟我儀協在彼中河樂且有儀協在彼中阿太玄經
各遵其儀協不偏不頗以是例之儀俄二字本同音所
謂常娥即常儀也予謂儀之作俄此誠可據或後人轉
寫為娥羿妃竊藥奔月之說從而傳會之耳楚詞天問
安得夫靈藥不能固藏則其妾已久又攷之通鑑前編
常儀乃帝嚳之四妃是知後人謂為月娥者以有常儀
占月事而又惑于帝妃之文故也

月有形無光日照之乃有光日似彈丸月似鏡體或以
為日亦似鏡體見京房占月御曰望舒亦曰纖阿見淮
南子月中有物婆婆者乃山河影其空處海水影亦見
淮南子須彌山有閭扶樹月過樹影入月中見佛藏經
冬至後月養魄于廣寒宮見東方朔十洲記月宮榜曰
廣寒清虛之府見龍城錄月中有兔與蟾蜍見五經通
義羿妻嫦娥竊藥奔月託身于月是為蟾蜍見後漢天
文志有逡飛雞朝往夕還常啣月中桂實歸于南土

見洞冥記月中有桂樹高五百丈又月乃七寶合成常有八萬二千戶修之見雜俎又考佛典言日為火珠月為水珠其廣徑各有由旬數皆七寶琉璃所成宮殿日天子月天子居之而道藏經又載日姓張名表字長史日中青帝名圓常元字照龍韜赤帝名丹靈峙字綠虹映白帝名皓鬱將字廻金霞黑帝名澄漕淳字玄綠炎黃帝名壽逸阜字颯暉像月姓文名申字子光月中青帝夫人名娥隱珠字芬艷嬰赤帝夫人名翳逸寥字婉

延虛白帝夫人名弄素蘭字鬱蓮花黑帝夫人名結連
翹字淳屬金黃帝夫人名青營襟字炁定容此等又與
釋典所言異且日月何以有姓氏名字紛紛傳會可為
拊掌也

王勃益州夫子廟碑帝車南指遁七曜于中階華蓋西
臨藏五雲于太甲揚用修丹鉛總錄以為晉天文志華
蓋杠旁六星曰六甲太甲恐是六甲按帝車北斗也太
微垣北七星曰北斗魁四星為璿璣杓三星為玉衡漢

與服志聖人觀於天視斗周旋魁方杓曲以攜龍角為
帝車夏五月建午斗柄指南南方之宿曰星七星為賢
士明則道化行暗則賢良不起魁下六星曰三能一曰
三台為天階一名泰階在太微垣西次二星曰中台為
中階上一星為公侯下一星為卿大夫華蓋七星在紫
微垣杠九星柄合十六星在勾陳上覆蔽大帝之座西
臨西方畢宿有五車五星凡此五車各以五寅日候之
金車庚寅木車甲寅火車丙寅土車戊寅水車壬寅有

雲各具其色者賢人隱其下也以甲寅為五候之首故曰太甲如云太乙遁藏意似謂孔子不得居公卿大夫之位而終身遯藏也

周將伐殷五星聚房齊桓將霸五星聚箕漢高入秦五星聚東井五星聚于箕方魏有天下五星聚箕尾安祿山反于燕宋太祖啟國五星聚奎太宗即位五星在奎四星聚柳張而光武興復于雒四星聚尾箕魏文受禪四星聚牛女而元帝中興揚土宋武北伐四星聚奎及

金匱要略卷之八
西伐秦四星聚井四星聚參渤海始霸四星聚危文宣
受終四星聚張周太祖代漢

五星二十八宿皆有異名木星故曰歲星張衡復名曰
攝提曰應星曰紀星蓋以木乃東方之精蒼帝之子故
以名之火星本曰熒惑廣雅謂之罰星又謂之執法土
星本曰填星鄭氏曰填讀如鎮張衡復名曰地候以土
義名之耳金曰太白詩又曰啟明曰長庚蓋以先日而
見謂之啟明後日而沒謂之長庚又昏見於西方西方

庚位故名爾雅又謂明星亦此意也又名火政大皞太
爽威星梁星殷星太正營星觀星官星明堂大衰大澤
終星大相天浩序星月緯水星曰辰星北方屬水之故
亦有數名曰小正天攬安周星細爽能星鈎星熒星伺
星角亢二星爾雅謂之壽星以其長於列宿數起於此
也氐曰天根爾雅解曰角亢下繫於氐猶木之有根也
故國語曰天根見而水涸房曰天駟天閑以主馬也國
語曰農祥晨正以立春之日房晨見農有事也然房心

尾三星總而名之大辰按左傳昭十七年宋曰大辰之
墟蓋以正屬房心二星故耳郭璞又曰龍星明者以為
時候故曰大辰心星一名三星具體而言也故詩曰三
星在天注心宿一名大火以三星之中最明之故七月
流火注云大火西流是也箕星詩稱為南箕晉志又名
天鷄亦名天津又箕斗總名曰漢津蓋箕乃龍尾斗為
南斗乃天漢之津梁故云牛星一名牽牛爾雅又名星
紀郭璞曰牽牛斗者日月五星之所終始故謂之星紀

又名河鼓荆楚人呼為擔鼓擔荷也女星一名嬭女嬭女之卑者也以織婦女工之卑故名石氏又名婺女虛曰玄枵蓋玄乃黑色虛位正北故云枵猶言耗也又曰顓頊顓頊旭也亦以水德位北之意又曰北陸國語曰天龜故左氏疏曰天龜玄枵別名也室星詩稱營室爾雅謂之定郭璞曰定正也作宮室皆以營室為正詩曰定之方中作于楚宮是也晉志曰一名清廟一名玄宮壁曰東壁又營室東壁總名嬭觜之口蓋以室四星相

對四方如口之故。妣背亦名豕韋。春秋襄十八年歲在豕韋是也。奎為封豕。爾雅曰降婁以奎主溝瀆之事故名降婁為聚衆胃為天倉。昴一名大梁一名西陸。皆以屬西方之故。別名鬣頭以其主胡也。又名留史。記索隱曰留昴也。畢星詩稱天畢。爾雅謂之濁郭璞曰或呼為濁以星形名也。一名四千車。參為白虎一名參伐。甘氏名鉞鉞主殺伐義也。井名東井以其義也。鬼為榆鬼以義名之也。柳謂之味郭璞曰味朱鳥之口也。按左傳襄

九年味為鶉火疏曰柳謂之味鳥口也又名鶉火蓋鶉鳥名朱乃火色皆屬南方故也又漢天文志仆鳥注注作喙爾雅曰鳥喙謂之柳翼軫一名鶉尾亦名鳥帑注傳襄二十八年裨竈曰歲棄其次而旅於明年之次以害鳥帑注南為朱鳥鳥尾曰帑疏曰人妻子為帑妻子為人後鳥尾亦鳥之後故俱以帑為言也

凡五星所行所直之辰其國為得位者歲星以德熒惑有禮填星有福太白兵彊辰星陰陽和其所主人事者

歲主福主大司農主齊魯主司天下人主之過主歲五穀熒惑主大鴻臚主死喪主司空又為司馬主楚吳越以南主司天下人臣之過主歲成敗填星主司天下女主之過太白主大臣上公大司馬辰星主刑主廷尉主燕趙主夷狄其盈縮失位元精降于地為人歲星降為貴臣熒惑降為童兒歌謠嬉戲填星降為老人婦女太白降為壯夫處于林麓辰星降為婦人

二十八宿分屬國朝之郡縣角亢屬河南之開汝氏屬

汝尾屬北直隸之順河真保永隆萬箕屬順河保斗屬
南直隸之應鳳蘇松常鎮廬安太寧池徽廣和滁揚淮
浙江之杭嘉處湖溫江西之吉瑞袁臨撫建南康廣饒
南昌南安贛九江牛屬中都之揚淮江西之九江浙江
之溫湖嚴金衢紹寧台福建之福泉延汀興邵漳廣東
之廣潮南肇高雷瓊廣西之梧女屬廣東之廣南肇高
雷瓊惠福建之建福泉延汀興邵漳浙江之溫嚴金衢
紹寧台廣西之梧虛屬山東之青濟登萊東昌室屬山

東之東昌北直隸之大名河南之彰衛懷奎婁屬兗州
昂屬北直隸之順德廣平真保定山西之大同畢屬北
直隸之真保山西之大同甯屬山西之平澤四川之松
藩壘溪參屬山西之平潞澤汾遼太原貴州四川之順
慶松藩壘溪井屬貴州之普安四川之成都保寧叙潼
眉嘉瀘雅永隆順慶天全陝西之西鳳漢平鞏臨慶延
寧洮文雲南之臨楚澂曲武山西之大遼解鬼屬陝西
之西鳳漢平鞏臨洮文四川之馬雲南之臨楚澂曲武

貴州之普安柳屬河南一府星屬貴州之銅仁張屬河南之南陽翼屬貴州之黎平廣西之平南慶潯柳桂廣東之廉四川之夔湖廣之郴安沔永辰常衡長岳荆黃德襄武陝西之漢中軫屬四川之平夔陝西之漢湖廣之靖武襄德黃荆岳長衡常辰永沔安廣東之廉廣西之柳平慶予觀分野之說如上所屬有一星而屬數府有二星而共屬一府者况中國則有屬東夷朔方西域俱無屬或星在南而屬在北或星在東而屬在西其理

殊不可解也

瑞星曰景星亦名德星曰周伯星曰含譽曰格澤妖星
曰彗星世名掃星曰孛星曰天鋒曰燭星曰蓬星曰長
庚曰四填曰地維歲光曰女帛曰盜星曰積陵曰端星
曰昏昌曰莖星曰白星曰菟昌曰歸邪曰濛星以上見
司天考又歲星所生妖星曰天槍曰天根曰天荊曰真
若曰天棖曰天樓曰天垣熒惑所生妖星曰天陰曰晉
若曰官張曰天惑曰天雀曰赤若曰蚩尤鎮星所生妖

星曰天上曰天伐曰從星曰天樞曰天翟曰天沸曰荆
翟太白所生妖星曰若星曰帚星曰若彗星曰竹彗星
曰墻星曰棖星曰白藿辰星所生妖星曰天美曰天冕
曰天杜曰天麻曰天林曰天高曰端下見京房集星章
又歲星之精流為天棓天槍天猾天衝國皇反登熒惑
之精流為析旦蚩尤旗昭明司危天攬填星之精流為
五殘六賊獄漢大賁炤星絀流第星旬始擊咎太白之
精散為天杵天拊伏靈大敗司姦天狗天殘卒起辰星

之精散為枉矢破女拂樞滅寶繞廷驚理大奮祀見河
圖又客星曰周伯老子王蓬絮國皇溫星流星有曰地
鴈天鴈梁星飛星有曰頓頑曰解銜曰大滑曰天刑又
流星曰天狗見中興天文志

余嘗疑天有五行星有五緯地有五嶽人有五事而二
十八宿何獨無中央之宿也後觀石氏星經云中宮黃
帝其精黃龍為軒轅首枕星張尾掛柳井體映三台司
四季司中岳司中土黃河江漢淮濟之水司黃帝之子

孫司倮蟲三百六十則固有所謂中宿矣又按張衡靈
憲蒼龍連蜷於左白虎猛據於右朱雀奮翼於前靈龜
圈脊於後軒轅黃龍於中則是軒轅一星與蒼龍白虎
朱雀玄武四獸為五矣世之言星者惟知四獸而不知
黃龍是求之未盡也亦猶民俗惟知四時而不知夏之
後有土位素問所謂長夏月令所謂中央五時取火夏
季取槐檀之火也軒轅本市垣之星而在張宿之分野
分為土德寄王鶉火亦由是也

埤雅云天地之氣噓而成雲噫而成風莊子云大塊噫氣其名爲風又云騰水上溢故爲霧又云陰伏於黃泉陽氣上通於天陰陽分爭故爲電董仲舒云陰陽之氣上薄爲雨下薄爲霧風其噫也雲其氣也雨乘空而墜風多則合速故雨大而疎風少則合遲故雨細而密淮南子云天之精雷電風雨也又云電激氣也雷以鞭策大戴禮云霜陰陽之炁也陰氣則凝而爲霜王充論衡云雲霧雨之微也夏則爲露冬則爲霜溫則爲雨寒則

為雪雨霧凍凝者皆由地發不由天降蔡邕云露者陰之液也五經通義云和氣精凝為甘露河圖云赤水之炁上蒸為霞曾子云陰陽之氣則為霧爾雅云地氣發天不應曰霧霧謂之晦釋名云虹陽氣之動也虹攻也純陽攻陰之氣也鄭玄注考靈曜云日旁氣白者為虹元命苞云陰陽交為虹霓侯鯖錄云雨氣成虹朝陽射之則在西夕陽射之則在東詩雲漢箋云天河水氣也精光轉運於天

冬至初陽雲出箕如樹立春少陽雲出房如積水春分
正陽雲出軫如白鵠穀雨太陽雲出張如車蓋立夏初
陰雲出觜赤如珠夏至少陰雲出參如水波寒露正陰
雲出井如冠纓霜降太陰雲出鬼上如羊下如蟠石見
易通卦驗韓雲如布趙雲如牛楚雲如日宋雲如車魯
雲如馬衛雲如犬周雲如輪秦雲如美人魏雲如鼠齊
雲如絳楚雲如龍蜀雲如囷見晉書山雲草莽水雲魚
鱗旱雲烟火沔雲波水見淮南子又見呂氏春秋又濯

魚雲見相雨書礮車雲見國史補卿雲見拾遺記商雲之色外赤內青見太玄經油雲見西京雜記景雲見竹書紀年彤雲見文選三素雲見道書梢雲見孫氏瑞應圖香雲見拾遺記

八節有八風立春條風春分明庶風立夏清明風夏至景風立秋涼風秋分閭闔風立冬不周風冬至廣莫風見易緯東北焱風又融風東滔風東南薰風南巨風西南凄風西颺風西北厲風北寒風見呂氏春秋東北條

風東方明庶風東南清明風南方景風西南涼風西方
閭闔風西北方不周風北方廣莫風見廣雅乾不周風
坎廣莫風艮融風震明庶風巽清明風離景風坤涼風
兌閭闔風見服虔注東北炎風東條風東南景風南巨
風西南涼風西颺風西北麗風北寒風見淮南子初春至
夏五日曰花信風梅花風先棟花風後凡二十四番見
歲時記五月落梅風見風俗通六月黃雀風見風土記
九月鯉魚風見提要錄三月鳥信風五月麥信風見國

史補仲秋蓼花風見月令章句八月裂葉風見洞冥記
又雄雌風見宋玉賦離合風見陸機要覽鄭公風見會
稽記上行曰扶搖風曲上曰羊角風見莊子梅雨後涼
風一月曰舶趠風見瑣碎錄颶母風發時先緩後急曰
鍊風見嶺南錄及番禺雜記八月風曰葡萄風見金樓
子又祛塵風在崑崙山見拾遺記又南風為凱風東風為
谷風北風為涼風西風為泰風見爾雅春晴日出而風
曰光風秋冬餘風曰緒風見楚詞

謂風曰孟婆舊以為宋勾欄中語蔣捷詞云春雨如絲
繡出花枝紅裊怎禁他孟婆合皂宋徽宗詞云孟婆好
做些方便吹箇船兒倒轉江南七月間有大風甚於舩
舩野人相傳以為孟婆發怒按北齊李騊駼聘陳問陸
士秀江南有孟婆是何鄉也士秀曰山海經帝之女遊
于江中出入必以風雨自隨以帝女故曰孟婆猶郊祀
志以地神為泰媼此言雖鄙俚亦有自來矣

幽風一之日飭發二之日栗烈按說文飭羗人吹角也

其聲悲栗故名飢栗冬日寒風驟發其聲似之所以風
寒謂之飢發也吳下田家志引諺云三九二十七籬頭
吹飢栗正謂風吹籬落其聲似飢栗與詩意合論語注
栗至罅發之時將墜尤有戰栗之象由是觀之飢發栗
烈初皆實字而毛已以風寒氣寒言之蓋影響之見也
集韻松凍洛也三蒼解詁液雨也其字音送俗曰霧松
漢書五行志雨木冰亦曰樹介又曰木稼稼即介之訛
耳寒甚而木冰如樹著介冑也曾南豐集云齊地寒甚

夜如霧凝於木上日出飄滿庭階尤為可愛遂作詩云
園林初日淨無風霧松花開樹樹同記得集英深殿裏
舞人齊挿玉籠髻齊地以為豐年之兆諺云霜淞如霧
淞窮漢備飯爨然松之極則以為樹介木冰諺云木若
稼達官怕蓋寒淺則為霧松寒極則為木冰霧松召豐
而木冰召凶也

二月杏花雨見提要錄清明為潑火雨見退齋雅聞三
月榆莢雨見汜勝之書四月薇香雨見李賀集五月三

日留客雨見陸機要覽夏至黃梅雨三月迎梅雨五月
送梅雨見風土記五月分龍雨見續博物志五月濯枝
雨見風土記暴凍雨見爾雅七月洒淚雨七月六日洗
車雨見歲時雜記八月荳花雨見歲時記九月黃雀雨
見提要錄立冬入液雨見瑣碎錄又旦日雨為月額雨
見金樓子又蜀中以常雨為爛雨見侯鯖錄

史皇作書天雨粟燕丹留秦天雨粟呂后時雨粟光武
末年陳留雨粟大禹時雨稻梁武成八年雨黍于齊梁

鯢八年雨黍于薛漢武帝時廣陽雨麥宣帝時江淮雨
穀三日建武三十一年陳留雨穀吳桓王時金陵雨五
穀五代時閩雨豆趙宋南渡後舒城雨米又雨木實如
沐莢子大禹時天雨金三日周成王時咸陽雨金顯王
時櫟陽雨金襄王時雨金于晉秦二世元年官中雨金
漢惠帝時宮中雨黃金黑錫漢翁仲孺貧天雨金十斛
于其家唐垂拱三年廣州雨金王莽時宮中雨五銖錢
至地為龜梁惠成七年雨碧于郢梁大同中雨雜色寶

珠隋仁壽四年陝雨金銀花又仁壽二年宮中雨水銀
花紂末年雨石魏時鄴中雨五色石漢成鴻嘉四年秋
信都雨魚長五寸李期時雨大魚于宮中皆黃色又赫
連鳳朔元年唐光啟二年元和十四年皆嘗雨魚元至
正二十五年六月大都雨魚漢武帝天漢間大雨白鰲
晉太始八年雨毛于蜀隋開皇六年雨毛于京師如馬
尾至三尺唐神龍二年四月雨毛于鄆熙寧戊申雨白
毛于巴陵長二三尺紂時天雨血永康元年雨血紂氏

後齊河清二年雨血于太原唐武德初雨血于突厥貞
元二十一年雨血于京師隋仁壽中宮中雨花如榆莢
周秦間河內雨酸棗今酸棗縣是也魏武時河內雨栗
漢元帝時雨草宋太始四年雨草于行宮唐貞元中雨
木于陳留大如指長寸許有孔其立如植唐垂拱四年
三月天台雨桂子旬餘咸通八年下邳雨湯殺鳥獸梁
顓王十二年齊地雨冰廣者六尺漢桓帝京師雨冰涼
張駿二年二月雨冰片如繡宋紹興戊午太康縣雨冰

龜首足卦文皆具

霄雪兩字音義皆異霄字以肖音屑說文雨霓為霄徐鉉注訂說文誤以肖為肖遂為臆說云霄雪著物則消此說可笑雪豈有著物不消者乎霰雪與片雪同一性也霓即霰也爾雅雨霓為霄注冰雪雜下謂之霄雪說文霰糶雪也陸佃云閤俗謂之冰雪今名濇雪與霄音相近也詩補傳曰粒雪郭璞爾雅注謂雨雜下也雪初作未成花圓如糶雪撒而下杜子美詩所云帶雨不成

花俗諺云夾雨夾雪也春秋緯曰盛陽之氣溫暖為雨陰氣薄而脅之則合而為雹盛陰之氣凝滯為雪陽氣薄而脅之則散而為霰韓詩相彼雨雪先集維霰薛君曰霰霰也夏侯孝若寒雪賦曰集洪霰之淅瀝煥摧磊之霍索謝希逸雪賦曰霰淅瀝而先集雪紛糅而遂多古詩詠霰云雪花遣汝作先鋒是也以此證之霄與霄迥不同矣霄以肖近天氣也揚雄賦騰清霄而軼浮景陶潛詩川滌餘霽宇變微霄道書所稱九霄青霄赤霄

紫霄絳霄玄霄之屬與霰霄字音義何啻千里

玄霜絳雪仙藥見漢武內傳周穆王時西王母貢嵯州
甘霜甜雪廣延國雪霜皆紺碧見拾遺記吉雲國有五
色露畢勒國亦有五色露見洞冥記水之美者有三危
之露露之美者有揭雲之露其色紫見呂氏春秋王者
施德惠甘露降一名膏露一名天酒見瑞應圖善飲國
人飲丹露云日初出時有露如珠見洞冥記又炎帝時
有香露崑崙山有朱露見拾遺記

諺云日出雨落公姥相撲謂陰陽不和也蔡邕曰陰陽不和則氣為虹虹見有青赤之色常依陰雲而晝見於日衝無雲不見太陰亦不見輒與日相互朝陽射之則在西夕陽射之則在東諺云東鸞日頭西鸞雨信然大率與霞相映朝霞不出市暮霞走千里是也莊子曰陽炙陰成虹禮疏云日照雨滴則虹生蓋雲心漏日日脚射雲則虹特明耀異常或能吸水或能吸酒人家有此或為妖或為祥朱子云既能吸水亦必有形質詩謂之

蝦蟆其字以虫俗謂之蠃其字以魚俗又謂之旱龍依其形質而名之也

今人以返照為倒景非也司馬相如賦貫列缺之倒景謂人在天上下向視日故日景倒在地下也陵陽子曰列缺氣去地一千四百里倒景氣去地四千里谷永曰登遐倒景如淳曰在日月之上反從下照故其景倒服虔曰列缺天閃也魏瓘賦凌倒景而將越莊子言野馬塵埃乃是兩物古人即謂野馬為塵埃如吳融云動梁

間之野馬韓渥云窻裏日光飛野馬皆以塵為野馬恐不然也野馬乃田間氣耳遠望如羣羊又如水波佛典謂如熱時野馬陽焰即此物也雀餒味雖甘色則白濁其臭如松脂嚼之膠舌甘露色微紅凝結如脂珠馨香而有酒味食之百竅皆爽也如醴泉有正味甘而飲之愈疾者若漢中元元年京師醴泉涌出飲之痼疾皆愈惟眇蹇者不瘳此方謂之醴泉若唐雲韶殿前穿井得甘泉止謂之甘泉耳

凡氣自華以南氣下黑上赤嵩高三河之郊氣正赤恒山之北氣青勃碣海岱之間氣正黑江淮之間氣皆白東海氣如員鑒附漢河水氣如引布江漢氣勁如杼濟水氣如黑狔渭水氣如狼白尾淮南氣如白羊少室氣如白兔青尾恒山氣如黑牛青尾東夷氣如樹西夷氣如室屋南夷氣如閣臺天子氣如城門如華蓋如龍馬猛將氣如龍如猛獸如火煙如白粉沸如火光夜照人如山林草木如張弩軍勝氣如堤如坂如火光如虵舉

首如覆舟負氣如馬肝如死灰如偃蓋如偃魚如羣羊
羣猪如轉蓬如揚灰如雙蛇如繫牛如飛鳥如決隄垣
如壞屋如驚鹿

每見史傳稱百六陽九而不得其說按洪景廬續筆云
以歷志攷之其名有八初入元百六曰陽九次曰陰七
又有陰七陽七陰五陽五陰三陽三皆謂之災歲大率
經歲四千五百六十而災歲五十七以數計之每及八
十歲則值其一然則陽九即當承百六而言所謂災歲

蓋不止陽九也及攷張世南游宦紀聞所載王湜太乙
肘後備檢則云四百五十六年為一陽九二百八十八
年為一百六陽九奇數也為陽數之窮百六偶數也為
陰數之窮與景盧所記不同而甚有理又曰后羿寒浞
之亂得陽九之數七赧王衰微得陽九之數八桓靈卑
弱得陽九之數九煬帝滅亡得陽九之數十周宣王父
厲而子幽得百六之數十二敬王時吳越相殘海內多
事得百六之數十三秦滅六國得百六之數十四東晉

播遷十六國分裂得百六之數極而反於一五代亂離
得百六之數三此所謂應者也舜禹至治得百六之數
七周成康得百六之數十一小甲雍已得陽九之數五
而百六之數九庚乙武丁得陽九之數六不降得百六
之數八盤庚小辛得百六之數十漢明章得百六之數
十五唐貞觀得百六之數二此所謂不應者也又有元
二之厄不可曉或云即元元也訛而為二耳又云楊孟
文石門頌中遭元二西夷虐殘孔耽碑元二坎軻人民

相食趙明誠云若作元元不成文理然徧攷歷數書無
之竊謂恐即入元百六而為陽九次為陰九詞人深晦
陽九陰九之語為元二耳

說畧卷一

欽定四庫全書

說畧卷二

明 顧起元 撰

方輿上

周禮均人以土圭之法測土深正日景以求地中日南則景短多暑日北則景長多寒日東則景夕多風日西則景朝多陰日至之景尺有五寸謂之地中乃建王國焉則周都潁川陽城所謂地中也草木子云崑崙天下山之頂也其東面中原也所以江淮河海水皆東流也

其西面西域諸國也自流沙以西水皆西流也南則吐蕃兩廣水皆南趨也北即沙漠又天下岡脊至高之處直北虎林至海都木鉢子田地地勢又逐漸而低水皆北流崑崙乃其結頂處四下之簷乃四方之國土考其流水可見道經云海外蓬萊閭苑有五岳靈山一曰廣乘之山天之東岳也在東海之中居九氣青天之內二曰長離之山天之南岳也在南海之中居二氣丹天之內三曰麗農之山天之西岳也在西海之中居七氣素

天之內四曰廣野之山天之北岳也在北海弱水之中
居五氣玄天之內五曰崑崙之山天之中岳也在八海
之間上當天心形如偃蓋東曰樊桐西曰玄圃南曰積
石北曰閼苑居於中元一氣天中焉又按宋沙門慧嚴
與南蠻校尉何承天共論華梵中邊之義引周公測景
之法謂此土夏至之日猶有餘陰天竺則無也言測景
者周公攝政四年欲求地中而營王城故以土圭測景
得潁川陽城於是建都土圭長尺有五寸夏至日晝漏

半立八尺之表表北之景尺有五寸景與土圭等此為地中鄭司農云凡日景於地千里而差一寸當知陽城蓋就此土自為中耳既有表景豈非餘陰邪故歷有大小二餘增損積算時輒差候明非中也天竺夏至之日日正中時豎晷無影所謂天中承天無所措難文帝聞之乃勅任豫受焉後婆利國人來果同嚴說成光子云中天竺國東至震旦國五萬八千里震旦即神州之號也南至金地國西至阿拘遮國北至小香山阿耨達池

各五萬八千里釋迦方域誌云池名阿那陀答多唐言
無熱惱也在香山南雪山北居山頂上池周八百里分
出四河各隨地勢而注一海故蔥嶺以東水注東海達
壩以南水注南海雪山以西水注西海大海以北水注
北海水經云無熱丘者即崑崙山山海經云流沙之濱
赤水後黑水前有大山名崑崙丘扶南傳云阿耨達山
即崑崙山山海經云海內崑崙墟在西北帝之下都方
八百里高萬仞十洲記云崑崙陵即崑崙山也在北海亥

地去岸十三萬里此指佛經蘇迷山也故崑崙近山則
西涼酒泉之地穆后見西王母之所具彼圖經若崑崙
遠山則香山雪山之中也河源出焉攷三教所紀以地
理而言雖未必如成光子之說然以水與日景而言參
之衆論則崑崙當為天地之中正天竺大千之界也賴
川陽城特中國之中周公宅中圖大必於是求之然未
可以盡通方之巨觀耳

爾雅云東方有比目魚焉不比不行其名鰈南方有比

翼鳥不比不飛其名鵜鵜西方有比肩獸焉與邛邛鉅
虛比為邛邛鉅虛齧甘草即有難邛邛鉅虛負而走其
名甕北方有比肩民焉迭食而迭望中有枳首蛇焉此
四方中國之異氣也廣雅又云東方有魚焉如鯉六足
鳥尾其名曰鯢南方有鳥焉三首六目六足三翼其名
曰鶩鮒西方有獸焉如鹿白尾馬足人手四角其名曰
攬如北方有民焉九首蛇身其名曰相繇中央有蛇焉
人面豺身鳥翼蛇行其名曰化蛇此五方之異物也所

載之不同如此

伏羲都陳今河南開封府陳州有陵存焉神農都陳同上或曰曲阜晉志曰都陳而別營於曲阜也今山東兗州府曲阜縣黃帝都涿鹿今順天府涿州括地志又曰涿鹿故城在媯州今朶顏之地少昊都曲阜同上顓帝都帝丘今山東濮州舊有陵碑尚存帝嚳都亳今河南偃師縣唐堯都平陽即今山西平陽府也有唐城虞舜都蒲坂即今山西平陽府蒲州夏都安邑即今山西平

陽府夏縣春秋疏曰堯治平陽舜治蒲坂禹治安邑三都相去各二百里俱在冀州蓋九州之冀也括地志又曰自禹至太康與唐虞皆不易都汲冢書曰禹都陽城漢志曰陽翟乃受封避舜子之所商都亳同上後盤庚遷都亦曰亳者書曰不常厥邑于今五邦蓋自湯至盤庚五遷也祖乙遷景盤庚復遷于亳周都豐鎬即今陝西西安府長安縣關中也徐廣曰豐鎬相去二十五里皆在長安南詩曰文王有聲作邑于豐宅是鎬京維龜

正之武王成之蓋都豐而遷鎬也又曰都洛陽即今河南府洛陽縣也太史公曰學者多稱周伐紂居洛邑其實不然武王營之成王使召公卜之居九鼎焉而復都豐鎬至平王乃遷洛公羊傳又曰王城者何東周也成王既卜營洛邑建明堂朝諸侯復還豐鎬蓋以洛居中土故曰京師秦都咸陽即今陝西西安府咸陽縣故古蹟阿房宮長信宮俱在此也西漢始都洛陽五年因婁敬說而復遷都長安東漢都洛陽同上魏都洛陽同上諸

書或曰長安曰譙曰許昌曰鄴者水經注曰魏因漢祚
復都洛陽以譙為先人本國許昌為漢之封居長安為
西京遺迹鄴為王業本基故號五都時一幸焉而吳初
居鎮江都武昌即今湖廣武昌府也後遷建業即今南
京應天府也蜀都成都即今四川成都府西晉都洛陽
同上東晉都建康同上宋齊都建康同上梁都建康同
上陳都建康同上元魏初居雲中即今山西大同府懷
仁縣後遷洛陽同上北齊都鄴即今河南彰德府西魏

都長安同上關中也後周都長安同上隋始都長安以城狹小水鹹與蘇威高頴共議移去城北三十里龍首山都焉後煬帝常徙都洛陽為巡幸故也唐都長安同上梁都汴即今河南開封府唐都汴同上漢都汴同上周都汴同上宋都汴同上南宋都臨安即今浙江杭州府元都大都即今北京順天府時至上都乃宣府之外之地國朝都應天永樂以北平為行在後為北京順天府輿地東界朝鮮境東西二千里東瀕海則朝鮮之外

亦濱海也西至嘉峪自嘉峪而西南則為西域河源蔥
嶺天竺在焉南濱於海海之南則為安南占城佛齊暹
羅東則為日本東南則為大琉球西南則為淳泥西洋
彭亨諸夷北連沙漠則九邊之外東為會慶府則金上
京與女直相鄰地北為舊開平則元上京越沙漠為威
鹵鎮殺狐鎮成祖北征所至之地南望北斗北則為和
寧元初建都於此自和寧北行四千餘里則為大澤又
東則為北國云

戰國策注辨證東西二周詳矣而宋劉忠定元城語錄
曰東西二周通封畿宗周鎬京也地方八百里八八六
十四為方百里者六十四也洛邑成周也方六百里六
六三十六為方百里者三十六也二都得方百里者百
為方千里也故詩曰邦畿千里東西長而南北短短長
相覆為千里此周武王時也至幽王時宗周滅所謂方
八百里失之矣及平王東遷洛邑則方六百里爾明邵
文莊簡端錄又曰昭公二十六年天王入於成周成周

下都也王既入成周矣曷不遂入王城也子朝之餘黨
在焉故也故萇弘之建議城成周也謂之遷都蓋其任
怨也大矣非忠之至者其孰能如此或者不知王城成
周為二遂以入成周為入于京師使遷都之說卒無所
歸而弘之忠不白于後世洛誥曰我卜澗水東瀍水西
是謂王城又曰我又卜瀍水東是謂成周嗚呼地之不
考乃害于義如此哉均可以補前注也

禹曰天下名山五千三百七十居地六萬四千五十六

里出銅之山四百七十六出鍤之山三千六百九十與管子同管子地數篇地之東西二萬八千里南北二萬六千里其出水者八千里受水者八千里

八埏東少海東南元澤南浩澤西南丹澤西泉澤西北海澤北寒澤東北通澤又八紘東北荒土東桑野東南衆女南反戶西南火土西沃野西北沙所北委羽又八極東北蒼門東開明門東南陽門南暑門西南白門西閭闔門西北幽都門北寒門見淮南子八陵東陵隄南

陵息慎西陵威夷中陵朱滕北陵鴈門又加陵溴梁河
墳見爾雅九府東方之美者有醫無閭之珣玕琪焉東
南之美者有會稽之竹箭焉南方之美者有梁山之犀
象焉西南之美者有華山之金石焉西方之美者有霍
山之珠玉焉西北之美者有崑崙墟之璆琳琅玕焉北
方之美者有幽都之筋角焉東北之美者有斥山之文
皮焉中有岱岳與其五穀魚鹽生焉見爾雅淮南子

周禮職方掌天下之圖以正南荊州其鎮曰衡今名南

嶽即舜南巡至於南衡者是也

今湖廣衡山縣

漢武元封五年

巡南郡霍山禮天柱峯遂以南衡遠阻此地亦名衡山

遂號為南嶽

今南直六安州

至隋復祀於湖廣之衡山至今不

改周禮以正北并州其鎮曰恒山今名北嶽即舜北巡

至於恒山者是也

今山西大同府渾源州

唐貞觀間真定曲陽縣

恒山忽爾飛石下縣朝廷以地亦名恒山遂因建祠為

北嶽

爾雅亦以此為北嶽

五代爪裂宋地又不至於大同因之以

祀到今弘治中兵書馬文升備奏唐宋之故今京師在

北南行以祀恒山為非禮當復於渾源之恒事下禮部
禮書倪岳乃禱曲陽而生者因執志必可信而神已飛
於曲陽遂寢

東嶽廣乘山在東海中南嶽長離山在南海中西嶽麗
農山在西海中北嶽廣野山在北海中中嶽崑崙山在
九海中為天地心此大五嶽也方壺山在北海扶桑山
蓬萊山沃焦山在東海連石山在東南鍾山在北海方
丈山員嶠山岱輿山俱在大海中酆都山在九壘之下

玄洲在北海中瀛洲生洲祖洲在東海中鳳麟洲聚窟
洲流洲俱在西海中炎洲在南海中長洲一名青丘在
南海中滄海島在北海中高五萬里皆神仙所居五帝
所理中國五嶽東岳泰山羅浮括蒼為佐命蒙山東山
為佐理南嶽衡山霍山潛山為儲副天台句曲為佐理
中嶽嵩山少室武當為佐命太和陸渾為佐理西嶽華
山地肺女兒為佐命西城青城峨眉嶓冢西玄戎山吳
山為佐理北嶽恒山河逢抱犢為佐命玄隴崆峒陽洛

為佐理又三佐命山青城山天柱山廬山又有十大洞
天則王屋委羽西城西玄青城赤城羅浮句曲林屋括
蒼三十六洞天則霍林蓬玄朱陵總真總玄司真虛陵
大妙洞虛詠真丹山赤水極玄陽明德玄天寶極玄好
生土元天柱司玄昇真化玄貴玄司真容城太王太秀
法樂長耀寶光太上寶玄秀樂長真玉闕寶圭湘真太虛
洞陽隱觀玄真太元大酉華妙金庭崇妙丹霞仙都祈
仙青田大鶴大滌玄蓋朱湖太生良常方會白馬玄光

金華洞光紫玄洞盟皆有真仙主之七十二福地則地
肺仙源玉瑠青嶼崆峒郁木坑武當君山桂源靈墟沃
洲天姥岑若耶溪巫山清遠東白安山馬嶺鷺羊洞真
壇洞宮玉清壇靈源陶山爛柯龍虎勒溪靈應白水源
金精閭皂始豐逍遙東北源鉢池論山毛公壇九華桐
栢平都綠蘿章觀抱犢大面虎溪元晨德山鷄籠玉峯
在藍田商谷張公洞長白中條霍山雲山四明緱氏臨邛
少室翠微大隱白鹿天柱大若巖嶠山西白天印金城

三皇井沃壤三十六精廬綿竹紫蓋瀘水丹陵守玄靈
淨送仙契靜凌虛鳳凰子真玄性契玄啟玄出谷君平
斗山光天眼德尋玄得一啟靈宗華朝真黃堂迎真招
隱紫虛啟聖啟靈鳳臺東華祈仙元陽東蒙貞陽右皆
有仙真修煉之跡按記事者可謂詳悉矣然滇詔之地
碧雞金馬蒼山洱水勝甲天下又自廣而西山皆聳秀
黛碧洞多深窈宏靚寧無仙真總理蓋記者當其時中
國版圖未備無所攷證耳

崑崙山一名崑岑君山一名媧宮武當山一名寥嶺普

陀山一名梅岑青城山一名天谷大復山一名胎簪衡

山一名芝岡東海一名岱淵

岱淵見
隨巢子

太史公自叙言著書藏之名山名山藏書自古多有之

按穆天子傳羣玉之山阿平無險四徹中繩先王之所

謂策府嵩高山記一石室有自然書及飲食九土文括

畧禹禪會稽山一石穴委曲黃帝藏書於此禹得之又

水經注石山有金簡玉字書禹發之得治水之理吳地

記包山中有洞庭深遠吳王夫差使靈威丈人入洞穴
十七日得玉葉上列靈寶經二卷使示孔子曰禹書也
吳越春秋九山東南曰天承山號宛委承以文玉覆以
藍石其書金簡青玉為字編以金銀禹登衡山有赤繡
衣男子自稱玄夷蒼水使者謂禹曰欲得我簡書知道
水當齋於黃帝之嶽禹乃齋登石簣山果得其文周行
天下使伯益記之為山海經荊州記小酉山石穴中書
千卷相傳秦人於此而學因留之梁湘東王云訪小酉

金史卷之八十三
卷二
之逸典是也武陵記天門山巖中有書數千卷見而不
可取伏滔北征記皇天塲古陶穴藏書二千餘卷

何仲默二秦志曰自秦入蜀有三谷四道三谷者其西
南曰褒谷南曰駱谷從洋入東南曰斜谷從郿入其所
從皆殊舊志謂首尾一谷非是其棧道有四出從成和
階文出者為沓中陰平道鄧艾伐蜀由之從兩當出者
為故道漢高帝攻陳倉由之從褒鳳出者為今連雲棧
道漢王之南鄭由之從城固洋縣出者為斜駱道武侯

屯渭上由之此四道三谷者關南之險阨攻取所從來固矣

張翠微考異南嶽有三一衡陽之衡山二廬江之霍山三舒州之灊山漢武帝以衡陽遼曠故移其神于廬江今俗皆號為南岳又九域志舒州懷寧縣有灊山為漢之南岳一名天柱山即漢武帝登灊天柱山是也按廬江古廬子國即春秋舒國之地張揖廣雅曰天柱謂之霍山地理志曰天柱在廬江潛縣漢武帝移岳神於天

柱天柱亦為霍山是則霍山與天柱一而已南岳安得
三耶首陽山有三一蒲坂二隴西三洛陽論語注以蒲
坂為夷齊所餓之地按考之洛陽者為是阮瑀弔伯夷
曰適彼洛師瞻彼首陽敬弔伯夷謂蒲坂者非也歷山
有四一河中府一齊州歷陽縣三冀州四濮州雷澤縣
皆有舜之遺蹟翠微考異以濮陽之歷山正舜畊之所
塗山亦有四一會稽二渝州三濠州鍾離縣四宣州當
塗縣皆立禹廟翠微考異以宣之當塗正禹之娶所則

其它皆謬托也又按禹娶于塗山會稽志塗山在山陰縣西北四十五里蘇鶚演義塗山有四一會稽二渝州三巴南舊江州四當塗縣按左氏昭公四年傳穆有塗山之會哀公七年傳禹合諸侯于塗山杜預解並云在壽春東北說者曰今濠州也柳宗元塗山銘序曰周穆遐追遺法復會于是山然則禹與穆王皆嘗會諸侯于塗山矣然非必皆壽春也若禹之所娶則未詳何地水經注江州縣水北岸有塗山南有夏禹廟塗君祠廟銘

存焉常璩庾仲雍並言禹娶於此越絕書吳越春秋乃云禹娶于會稽塗山應劭曰在永興北永興今蕭山縣也又與會稽志所載不同蓋會稽乃禹會諸侯計功之地非所娶之國也

會稽臨安金陵三郡皆有東山俱傳以為謝安攜妓之所按謝安本傳初安寓居會稽與王羲之許詢支遁遊處被召不至遂棲遲東山唐裴冕與呂謂等鑑湖聯句有興衰還尋戴東山更問東此會稽之東山也本傳又

云安石嘗往臨安山中坐石室臨濬谷悠然嘆曰此與
伯夷何遠今餘杭縣有東山東坡有遊餘杭東西岩詩
注云即謝安東山所謂獨攜縹緲人來上東西山者是
也此臨安之東山也本傳又謂及登台輔於土山營墅
樓館林竹甚盛每攜中外子姓游集今土山在建康上
元縣崇禮鄉載建康事迹云安石於此擬會稽之東山
亦號東山此金陵之東山也然南史載宋劉劭經始鍾
嶺以為棲息亦號東山金陵遂有兩東山矣

山海經太行山一名五行山列子作太形則行本音也
河圖括地象云太行天下之脊郭緣生述征記太行首
始河內自河內至幽州凡有八陁崔伯易感山賦上正
樞星下開冀方起為名丘妥為平岡魏乎甚尊其名太
行蓋趣韻之誤耳

左傳成公二年晉卻克戰於鞍齊師敗績逐之三周華
不注相傳讀不字俱作卜音伏琛齊記引摯虞畿服經
不跗之注于水其說甚異而有徵又按水經注云華不

注山單椒秀澤孤峯刺天青崖翠發望同點黛九域志
云大明湖望華不注山如在水中李太白詩昔我遊齊
都登華不注峯茲山何峻秀綵翠如芙蓉比之芙蓉蓋
因華不之名也以數說互證之伏氏音不為跗信矣

蜀山之大者曰岷山其川曰岷江岷字說文作𪔐省作
岷漢人隸書作汶多與汶相混列子貉不踰汶謂川江
也非汶土也殷敬順已辨之史記冉駹為汶山郡司馬
溫公類篇曰汶音岷據史記引禹貢岷嶠既藝及岷山

之陽及岷山導江皆作汶蓋古字通用也三國志蜀後主至湔登坂觀汶水之流王右軍與周益州撫書曰要欲一遊目汶嶺五代史蜀主王建貶衛尉少卿李綱為汶川尉徐無黨注汶讀作岷而今汶川縣誤呼作問音也

赤壁山乃吳破曹處湖廣赤壁有五漢陽漢川黃州嘉魚江夏皆有之惟武昌嘉魚縣西南八十里大江濱北岸烏林南岸赤壁是也唐屬蒲圻故云去縣西百四十

里今屬嘉魚宋謝枋得猶于石崖見赤壁二字蘇子瞻
所遊乃黃州西下津江百步赤壁磯土人訛為赤鼻非
故地也可謂賦而失實張文潛但知辨其誤而亦不識
此山之名子瞻所遊自名石鍾山也驩堯崇山今以為
湖廣之慈利縣非也沈佺期詩集有從崇山向越裳詩
其序云按九真圖崇山越裳四十里杉谷古崇山竹谿
從道明國來於崇山北二十五里合水歌缺籐竹明昧
有三十峯夾水直上千餘仞諸仙窟宅在焉其詩云朝

發崇山下暮坐越裳陰西從山谷變北上竹谿深竹谿
道明水杉谷古崇岑以此證之崇山乃在交廣之域為
是

裴氏廣州記云五嶺大庾始安臨賀桂陽揭陽鄧德明
南康記云五嶺者臺嶺之嶠五嶺之第一嶺也在大庾
騎田之嶠五嶺之第二嶺也在桂陽都龐之嶠五嶺之
第三嶺也在九真萌渚之嶠五嶺之第四嶺也在臨賀
越城之嶠五嶺之第五嶺也在始安都龐水經注作部

龍萌渚與地志作明諸徐廣曰五十萬人守五嶺淮南
子曰始皇利越之犀角象齒翡翠珠璣乃使尉屠睢發
卒五十萬為五軍一軍塞鍾城之嶺一軍守九嶷之塞
一軍處番禺之都一軍守南野之界一軍結餘干之水
注鍾城接鬱林九嶷在零陵番禺在南海南野餘干在
豫章其說五嶺又不同

天山雪山祁連山白山四名其實一也明帝紀擊破白
山虜於蒲類海上章懷註曰山冬夏有雪故曰白山匈

奴謂之天山過之皆下馬拜之又杜詩註天山即祁連山在伊州一名雪山

昔人文章用北方事多言黑山黑山在大幕之北宋謂之姚家族有城在其西南謂之慶州沈括云予奉使嘗帳宿其下云山長數十里土石皆紫黑似磁石有水出其下所謂黑水也土人言黑水源下委高水曾逆流予臨視之無此理亦常流耳山在水之東大抵北方水多黑色故有盧龍郡北人謂黑為盧水為龍盧龍即黑水

也

杜少陵愁坐詩云葭萌氏種迴左擔犬羊屯葭萌左擔
皆地名葭萌人皆知之左擔人罕曉也按太平御覽引
李充蜀記云蜀山自綿谷葭萌道徑險窄北來擔負者
不容易肩謂之左擔道也

地志金陵為古雲陽氏之都按遁甲經云沙土之福雲
陽氏之虛也可以長往可以隱處即今茶陵之雲陽山
攷之皇甫紀實為少昊之封雲陽氏之蹤固在甘泉甘

泉之山本曰雲陽以故黃帝以來每大祀必于甘泉然則長沙之地其亦為始封乎若丹陽曲阿則秦世之雲陽嶺也吳地記錄曲阿正秦代之雲陽嶺太史時言東南有天子氣在雲陽間秦人于是發赭徒三千鑿雲陽之北岡曲之因曰曲阿則今之丹徒也昔吳岑昏鑿丹徒至雲陽杜野小辛間而陳勲屯田鑿句容中道至雲陽西城則今之破岡瀆也故杜佑以丹陽為古雲陽而學道傳謂是茅山若絳北之陽石者非其址矣

地有空桑在東窮桑在西歸藏啟筮云空桑蒼蒼八極
既張乃有羲和是主日月蓋指隅夷之地故記孔子生
于空桑春秋演孔圖云徵在游于大冢之陂夢黑帝謂
已汝產必于空桑而干寶所記徵在生于空桑之地今
名孔竇在魯南山之穴故孔廟禮器碑云顏育空桑空
桑魯北孔子魯人故說者指云空桑南山穴之說已自
戾矣若共工氏振鴻水以薄空桑則為葦陝之間伊尹
莘人故呂氏春秋古史攷俱言尹產空桑空桑故城在

今陳留固非魯也地記言空桑南杞而北陳留各三十里有伊尹村而所謂窮桑則非此矣拾遺記言窮桑者西海之濱也地有孤桑千尋蓋在西垂少昊之居梁雍之域顓頊繼少昊者故世紀亦自窮桑遷商丘而杜預遽以窮桑為在魯北至釋例地名乃云地闕故穎達云言魯北者相傳言爾蓋以定四年傳封伯禽于少昊之墟逆之而史之所記乃在曲阜又因預而妄之也郡國志云少昊自窮桑登帝位非空桑明矣

蕭何封鄜侯今世家作鄠侯字相似之誤也鄜七何切
班孟堅十八侯銘文昌四友漢有蕭何序功第一受封
於鄜又唐詩麒麟閣上識鄜侯按鄜在沛鄠在南陽何
起沛封邑必近之且孟堅去何未遠所聞必真師古云
何封南陽之鄠疑未深考也

楊用脩以方城為萬城陳伯晦引史記阻之以鄧林緣
之以方城又我悉方城外及服虔杜預之說以正之然
不如盛弘之荊州記之明切也其云葉東界有故城始

隼縣東至瀨水達沘陽界南北聯聯數百里號為方城
一謂之長城南北雖無基築皆連山相接而漢水流其
南故屈完云云何其易曉也郡國志葉縣有方城郭仲
產曰苦菜于東俱有方城又楚狂接輿耕於方城之南
蓋皆傍此長山方城而名者也

語云鴈門紫塞地皆在北今人稱北為鴈塞非也荊州
記鴈塞北接梁州汶陽郡其間東西嶺屬天無際鴈飛
翥至此即回翼唯一處稍下每鴈飛達則矯翮裁度下

處而過故名鴈塞地在蜀漢間也

錢唐二字其來甚遠按史記始皇本紀至雲夢浮江下丹陽至錢唐臨浙江上會稽立石刻頌秦德西漢地理志亦有錢唐縣今唐字從土則誤矣蓋以錢易土及捐錢築塘等事皆傳會之辭也

楚章華臺亳州陳父縣陳州商水縣荊州江陵長林監利縣皆有之乾谿亦有數處據左傳楚靈王七年成章華之臺與諸侯落之杜預注章華臺在華容城中華容

即今之監利縣非岳州之華容也至今有章華臺在縣郭中與杜預之說相符亳州陳父縣有乾谿其側亦有章華臺故臺基下往往得人骨云楚靈王戰死于此商水縣章華臺之側亦有乾谿薛綜注張衡東京賦引左氏傳乃云楚子成章華之臺于乾谿皆誤說也左傳實無此文章華與乾谿元非一處楚靈王十二年王狩于州來使蕩侯潘子司馬督崑尹午陵尹喜帥師圍徐以懼吳王次于乾谿此則城父之乾谿靈王八年遷于夷

者乃此地十三年公子比為亂使觀從師于乾谿王衆
潰靈王亡不知所在平王即位殺囚衣之王服而流諸
漢乃取葬之以靖國人而赴以乾谿靈王實縊于芊尹
申亥待他年申亥以王柩告乃改葬之而非死于乾谿
也昭王二十七年吳伐陳王帥師救陳次于城父將戰
王卒于城父而春秋又云弑其君于乾谿則後世謂靈
王實死于是理不然也

康成以三亳阪尹共為一事云湯舊都之民服文王者

分為三邑其長居險故言阪尹蓋東成臯南轅轅西降
谷也皇甫士安以蒙為北亳穀熟為南亳偃師為西亳
蔡註立政用士安說註盤庚又用康成說二書亳同康
成說是

載籍中所言地理訛舛甚多姑數其一二漢文帝封淮
南長子陽周侯賜為廬江王應劭曰廬子國廬子國即
廬戎之地按左傳廬戎自在容城山中劭誤以中廬之
廬為廬江之廬矣舜漁雷澤正城陽之雷澤而周處風

土記乃以吳之太湖大雷山小雷山為舜漁之所子胥之胥山在嘉興東南而張晏乃以太湖之承胥二山為子胥之山李白讀書於匡山正綿州大匡山小匡山之處而寰海記舊註乃指江州匡廬山為白讀書之所楚之雲夢跨江南北左傳曰王以田江南之夢則知雲在江北而郭璞注爾雅乃以岳陽巴丘湖為楚之雲夢後漢樊丹封謝陽侯正詩所謂申伯番番既入于謝之謝地也而傳乃以為射陽按射陽在山陽西即漢高祖封

項纏之地非丹封地也樊毅碑曰謝陽之孫此可驗也

鄒衍言九州之外復有九州載于史記按其說曰東南

神州曰旦土

旦音與晨同

正南邛州

隋書作迎

曰深土西南戎州

曰滔土正西弇州

隋書作拾州

曰升土正中冀州曰白土西

北柱州曰肥土正北玄州

隋書作營州

曰咸土東北咸州曰

隱土

尸子作急土

正東陽州曰信土其言本荒唐漢人作河

圖括地象全祖其說隋作郊天遂以其名入從祀之位

史炤通鑑釋文曰此九州其崑崙統四方之九州乎或

曰神農地過日月之表蓋神農之九州也又按淮南子載九州東南神州曰農土正南次州曰沃土西南戎州曰滔土正西弇州曰并土正中冀州曰中土西北台州曰肥土正北濟州曰成土東北薄州曰隱土正東陽州曰申土與前小異

司馬子長自叙云上會稽探禹穴此子長自言徧遊萬里之目上會稽總吳越也探禹穴言巴蜀也後人不知其解遂以為禹穴在會稽而作地志者以禹廟旁小坎

如春曰者當之按蜀之石泉禹生之地謂之禹穴其石
杳深人迹不到明巡撫儀封劉遠夫修蜀志搜訪古碑
刻有禹穴二字乃李白所書始知會稽禹穴之誤水經
注石泉縣有石紐村禹所生也

唐詩春雲生嶺上積雪在囂間山凹之地堪為墟市者
曰囂尚書序仲丁居于囂其地在陳留浚儀之間秦之
敖倉也敖即囂也三川為天下之朝市故名曰敖云左
傳有囂氏之隧史記注青陽在青之陽玄囂在玄之囂

梁宣帝七山寺賦神囂崑崙而特立仙的皎皎以孤臨
皆以囂為地名也周禮司市之文云禁其鬪囂注鬪以
力爭囂以口爭交市之地必多爭故禁之此益可證囂
之為市其義所從來遠矣後世市謂之墟歸市曰趨墟
言有人則囂無人則虛也

漢地理志有胸忍縣顏師古注音劬誤也按說文胸腊
挺也其俱反字既從句與地名何干通典作胸腮胸音
如順切腮如尹切讀如閨蠢通典之音得之矣而字作

胸則因漢志而誤也當從胸乃叶閏字之音胸腮蟲名
夔州地多此蟲遂以為名又謂胸腮屬漢中亦誤檢地
志漢中實無此縣雲安之西三十里萬戶驛下橫石灘
上土人云驛之左右胸腮故地也

詩曰民之初生自土漆沮齊詩作自杜漆沮言公劉避
狄而來居杜與漆沮之地杜水名即杜陽也據文義作
杜為長耳

銅柱不獨馬援吳黃武二年程普闕雲長分界鑄銅柱為


誓在衡山縣西北一百二十里又五代晉與楚王馬希範立銅柱為界學士李臯銘在辰州西北一百十里會溪對又涪陵江口名銅柱灘也

史記齊世家魯伐我入陽關徐廣曰在鉅平括地志兗州博平縣南二十九里西臨汶水唐陽關在安西詩西出陽關無故人是東西兩陽關也

宋潤州丹楊館書從木其屬縣丹陽書從阜或者疑之考晉地理志謂山多赤柳故名丹楊江南地志謂郡北

有赭山故名丹陽二說皆有據也抑又考之兩漢丹陽郡治宛陵而丹陽縣則今建康也至移郡治於建康而元帝又徙都焉於是以建康守為丹陽尹至唐天寶初始以今京口為丹陽郡而以曲阿為丹陽縣然則今潤之丹陽正非漢丹陽之故治也丹陽凡有數處楚鬻熊始封丹陽則在今歸州秭歸縣後楚文王徙都江陵府枝江縣亦曰丹陽漢於宛陵置丹陽郡隋於丹州置丹陽郡唐於京口置丹陽郡其地不一而西漢志乃以曲

阿之丹陽為楚所封誤矣



說畧卷二

欽定四庫全書

子部
說略卷三

詳校官中書臣孫球

主事臣祁韻士覆勘

總校官庶吉士臣何思鈞

校對官中書臣楊世綸

謄錄監生臣周元梓

欽定四庫全書

說畧卷三

明 顧起元 撰

方輿下

有兩石頭一在金陵一在豫章在金陵者所謂鍾山龍
蟠石頭虎踞王處仲蘇峻所據之地也在豫章者即韓
退之次石頭驛詩也有兩石城一在金陵一在竟陵在
金陵者即左思所謂戎車次于石城是也在竟陵者即
莫愁所居之城也有三西塞一在金陵一在雪川一在

武昌在金陵者乃石城西北之處在雩川者張志和所稱願為浮家泛宅往來苕霅間者也在武昌者乃曹武成王用師之城今黃州上有西塞山是也

越絕書柴辟亭到語兒就李吳侵以為戰地又云語兒鄉故越界名曰就李吳疆侵越地以為戰地至于柴辟亭又云女陽亭者句踐入臣于吳夫人從道產女此亭養于就李鄉句踐勝吳更名女陽更就李為語兒鄉水經注云東逕禦而鄉萬善歷曰吳黃武六年正月獲彭

綺是歲由拳西鄉有產兒隨便能語云天明河欲清脚折金乃生因是詔為語兒鄉非也國語曰句踐之地北至禦兒韋昭曰越北鄙在嘉興是也今嘉興志語溪在崇德東南一名語兒中涇又名沙渚塘為吳棲兵之地又錢塘有女兒橋亦此前漢書封禳終古為語兒侯孟康曰越中地名後漢書南粵傳東粵使徇北將軍守武林樓船軍卒錢塘禳終古斬徇北將軍為語兒侯師古曰錢塘會稽縣禳音袁孟康曰語兒越中地今吳南亭

是也師古曰語或作禦或作御音同侯鯖錄語兒梨果實之珍因其地名也

高宗伐鬼方之事惟見于易鬼方極遠之國即莫靡之屬也蒼頡篇云鬼之為言遠也世本黃帝娶于鬼方氏漢匡衡疏云成湯化異俗而懷鬼方意者湯時鬼方已內屬於武圉之中而復叛於中衰之日故高宗伐之以中興殷道也又西羌傳曰殷室中衰諸侯背叛至於武丁征西戎鬼方三年乃克故其詩曰自彼氐羌莫敢不

來王是其證也竹書紀年周王伐西落鬼戎按今貴州有羅鬼夷楚辭得人肉而祀以其骨為醢紂醢脯九侯亦效夷虐也

岑參詩首蓐峰邊逢立春葫蘆河上淚沾巾皆紀塞上之地也唐三藏西域志塞上無驛亭又無山嶺止以烽火為識玉門關外有五烽首蓐烽其一也然則今作峰者非也

漢史言匈奴漠南無王庭謂陰山之南黃河之北也陰

山在山西陝西之北繞河流南折橫亘千里西出賀蘭東踰燕薊而抵醫無閭重山連阜峻嶺懸崖隔閼北狄過此山後南北數千里東西數千里皆是砂磧無水草名為大磧虜駐此人畜皆乏食若不得據陰山之南必須踰此石磧而居其北北即漠北也漠南無王庭者石磧之南陰山前後也

張良對高祖言長安形勝曰南有巴蜀之饒北有胡苑之利史記漢書皆不解胡苑之義後人或改苑作戎非

也按漢官儀引郎中侯應之言曰陰山東西千餘里單于之苑囿也又有歌謠曰失我燕支山令我婦女無顏色失我祁連山令我六畜不蕃息所謂胡苑之利當是此義也

牧誓微盧彭濮汲冢周書伊尹為四方獻令正南百濮鄭語楚蚡冒始啟濮劉伯莊曰濮在楚西南左傳糜人率百濮伐楚通典有尾濮木綿濮文面濮折腰濮赤口濮黑焚濮爾雅南至于濮鉛周書王會篇卜人以丹砂

注云西南之蠻蓋濮人也諸濮地與哀牢相接今按哀牢即永昌濮人今名蒲蠻其色黑折腰文面是其飾也濮與蒲字音相近而訛爾

宣和畫譜中載有拂林圖或作拂林又作拂菻不知所謂後考杜環經行記拂林在苦國西一名犂靬其人顏色白婦人皆服珠錦善織絡琉璃妙天下菴音力甚切董北苑畫跋云拂林圖自唐有之其人類中國婦人皆衣胡綾紺文雜錦戴金花步搖綴以木難青珠盧肇雙

柘枝舞賦云拂蘇妖嫠西河別部蓋如唐人之胡旋女
元末之天魔隊耳

易井卦朱子解云井者穴地出水之處不曰鑿井而曰
穴地何也按中山經云帝囷山有井焉名天井孫子兵
法云地陷曰天井穴地出水蓋此類耳穴地之井天所
為也鑿地之井人所為也先天上古穴井後天中古鑿
井也

市井二字人有謂古者城分九區如井字公宮後列為

市井者按後漢循吏傳中云白首不入市井注引春秋井田記曰井田之義有五曰無泄天時地氣二曰無費一家三曰同風俗四曰合巧拙五曰通財貨因井為市交易而退故稱市井也

左傳鄭伯肉袒牽羊以逆楚子曰云云使改事君夷于九縣注楚滅九國以為縣願得比之正義謂息鄧弦黃夔江六蓼庸權申息凡十一國不知何以言九沈重謂權是小國庸先屬楚自外為九也皆曲說不通竊意九

為陽數之極故書傳凡言九者皆指其極也楚辭九歌乃十一篇亦止言九也如九陵九淵九攻九守皆可以此例推之後漢書云九縣飈回正用此語

左傳九丘八索九丘即九州也八索即八澤也見淮南子或以八索為八卦謬矣通鑑外紀云人皇氏依山川土地之勢財度為九州謂之九圍各居其一而為之長人皇居中州以制八輔此引春秋命歷敘文也九圍取育草木為義即後世所謂九州也中州則人皇之都石

鼓文所謂寓逢中園也八輔則餘八園也園亦作有古
字省文書書以有九有之師詩九有有截又奄有九有
作九圀解之義尤明暢左傳謂之九藪陽紆雲夢之屬
周禮九藪揚州具區荊州雲夢豫州圃田青州孟豬一
曰望諸兗州大埜雍州弦蒲幽州獫狁冀州陽紆并州
昭餘祁爾雅又有十藪魯大野晉大陸秦楊陁宋孟諸
楚雲夢吳越具區齊海隅燕昭余祁鄭圃田周焦獲淮
南子九藪曰越之具區楚之雲夢秦之陽紆晉之大陸

鄭之圃田宋之孟諸齊之海隅趙之鉅鹿燕之昭余盛
與周禮所載不同也

王子年云禹治水所穿鑿處皆有泥封記使玄熊升其
上此封堠之始按北堂書抄引山海經黃帝遊幸天下
有記里鼓道路有記里堆則堠起黃帝非始于禹也

詩町疇鹿場毛萇云鹿跡也說文曰町疇禽獸所踐處
蓋因町疇下有鹿場字遂以鹿跡獸踐附會之鹿跡獸
踐可以解鹿場不可以解町疇也原詩人之意謂征夫

久不歸家町疇之地踐為鹿場非謂町疇即鹿場也且說文以町疇字載於田部曰凡田之屬皆以田若町疇果為獸踐則非田之屬也考之他訓左傳町原防井衍沃千寶注平川廣澤可井者則井之原阜堤防不可井者則町之町小頃也張平子西京賦徧町成篁注町謂畝畝王充論衡町町如荊軻之廬石鼓文原隰既垣彊理疇疇毛伯敦銘予既疇商莊子舜舉于童土之地其疏云童土疇也皆說田野並無鹿跡之說也

四海之邊中國者在山東則為東海在廣南則為南海
人人聞見若禹迹所及西境流沙而不言西海東北嘗
至碣石而北海之名不著于經則謂外薄四海訖于四
海者如之何而四也漢武帝使命方行四表故西北二
海遂有身歷而目擊之者於是條支之西有海焉先漢
使命固嘗見之而入諸史矣後漢班超又嘗遣甘華輩
親至其地至於西海之西又有大秦國焉即波斯也夷人之
與海商皆嘗往來若夫北海則又其甚遠者而霍去病

之封狼居胥山也其山實臨瀚海者北海也蘇武郭吉
皆為匈奴所幽寘諸北海之上而唐史所載又曰突厥
部北海之北更有所謂骨利幹之國焉在海北岸然則
諸書所稱四海者實皆環夷夏而四之非寓言矣若夫
西北二邊有西海栢海青海蒲類海蒲菖海居延海白
亭海鮮水海皆嘗並海立稱然要其實致則衆水鍾為
大澤如洞庭彭蠡之類故借海以名之非真海也李吉
甫辨白亭海而曰河北得水便名為河塞外有水便名

為海其說確也班固叙張掖之水曰羌水出羌中東北至居延入海則真以居延為海矣

楚辭天問東流不濫孰知其故柳子之對朱子之註大抵以歸墟為說夫水由氣而生亦由氣而滅今以氣墟物則得水又以氣吹水則即乾由一滴可知其大也歸墟尾閭是水之大窮盡氣之大升降處山海經云汜天之山赤水窮焉不姜之山黑水窮焉音朽塗之山青水窮焉不庭之山滎水窮焉成山甘水窮焉則衆流各有

窮處至此即化氣而升不必至歸墟也又莊子云日之過河也有損焉風之過河也有損焉風日皆能損水但甚微而人不知覺若褰衣於日中標濕於風際則立可驗此隨時而消息也覆杯水於坳堂則立而乾洒激泉於焦原則立而涸此隨地而消息也

禹貢載敷淺原蓋江鄂之間孔氏謂一名博陽山顏師古云博當為傅漢志豫章歷陵縣南有博陽山傅陽川在南古文以為敷淺原音為敷陽誤為博爾水經注云

敷淺原地在豫章歷陵縣西南水經所載禹貢山水澤地凡六十山指名曰山水指名曰水而稱地者四流沙九江東陵敷淺原也孔顏以為山者異矣按通典云蒲塘驛漢歷陵縣有敷淺原西十里有博陽山以今縣南十三里有陽居山舊經依固以為敷淺原名博陽山然縣境惟有一水流入大江人謂博陽川乃在此山東北與志不合杜佑復析敷淺原傳陽山為二蓋以敷淺原之水也

十道四蕃志敷淺原博陽水俱在饒州九江新舊潯陽錄記顏魯公過蒲塘驛辨土俗所呼蒲

淺水蒲敷音之轉南有博陽山土人呼濮陽山濮博亦音之訛則又以為博陽矣

博陽之山不

得而實爾按驛西數十里惟有一望夫山蓋望敷爾潯陽志博陽山在德安縣南十三里望夫山在德安縣西北十五里高一百丈謂升此望敷也隋志湓城望夫山或曰望君是也方輿記謂夫行役妻每高登而望箱土積高而為名然寰宇記巴陵當塗黎德安皆有望夫之山俱以婦人為說謬矣志言邑人或謂縣古有敷淺原登此可以望之故名望敷以今山下近村猶以敷裏敷

外為名斯得之矣蓋望都之類爾今崇陽之西二百二十里有雲溪山峭峻清流界道如帶即所謂敷淺原也非博陽山

揚州文有三江而導水之文乃有中江北江釋者於是紛紛孔謂江自彭蠡分三以入震澤而鄭復以東迤為南江歷代不決不知所謂三江非中北之江中北之江初無三江之名而三江元不入震澤也職方三江揚州之川郡國志韋昭等以吳郡南松江浙江浦陽江為之

按此皆自會稽入海者自班固冒以南中北之名遂與岷漢入滙之名文相亂故或者疑南松等為是吳中小水不足名川于是以岷漢充之故志林云江於彭蠡分為三以入海然江自夏口合漢以入彭蠡即合為一自蕪湖出繇秣陵京口至崇明入海何嘗有三桑欽許慎謂江至彭蠡石城而分為二一為中江今大江一為北江浙江也然浙出于黟至餘姚定海而入海與長江正自隔絕故漢注又為岷為大江至九江為中江至徐陵為

北江是一源而三目豈其然邪夫贛源于西章本曰豫水豫章之名始此而西章明有江南之號則亦可謂三江特此一江禹所不至禹貢不見學者有不之知夫以震澤在吳彭蠡在楚略不相及今乃謂江自彭蠡分入震澤為北江是誤以揚州之文解之也三江既入震澤底定者謂三江既入于海而震澤亦以致定此自二事非謂其入震澤此鄭所以謂三江分于彭蠡為三流東入海然謂分為三流則愈疎矣且雷夏既澤澨沮會同

雷澤在兗澠沮在雍兗東雍西亦自二事而安國亦以
為二水會同於此澤蓋不知地理之所至也然又攷之
海內東經會稽之山在大楚南三江之首大江出岷山
海江出蔓山南江出高山高山在城都西皆入于海故
郭景純以岷江易浦陽今人特不知其處爾學者又何
可妄引淺證而罔之哉

蔡沈黃震說三江皆於下流求之名以地訛號隨世改
恐非禹貢之三江也按徐鉉注說文云江出嶧山至楚

都名南江至潯陽為九道名中江至南徐州名北江入海郭璞山海經注岷山大江所出也岷山南江水所自出也岷山北江水所自出也三江皆發源於蜀禹貢紀其源而及其委耳

導山之文自岷山至衡山過九江至于敷淺原而導江自岷山至于澧過九江至于東陵東迤北會于滙東陵今之巴陵與夷陵相對出為東西以夷陵曰西陵則巴陵為東陵信矣故唐志以今鄂州巴陵為是九江蓋在

東陵而上顧不在彭蠡下也按荊州文九江孔殷鄭氏
以為殷者多也謂九江從山溪所出其孔甚多以言治
之之難九江各源其下流合于江而非大江孔安國言
江於荊界分為九道應劭遂以為自潯陽分班氏之志
則以為在潯陽縣南皆東合于大江而以東陵為在廬
江金蘭水經亦云金蘭西北以廬江郡有東陵鄉也不
知金蘭乃在滙之下流非大江之所至許叔重云迤邪
行也今江水過洞庭至于巴陵而後東北邪行入于彭

澤所謂至于東陵東迤北也豈潯陽之區哉且以大水
受小水謂之過二水相受大小均謂之會河水東過洛
汭北過洛水洛洛之水入河河水過之而已漾過三澨
渭過漆沮亦猶是也自江分為九道則經當云播為九
江不云過矣九江舊說一畝二白蜺三嘉靡四烏土五
蚌六益七磨八沙提九廩為之或百里或五十里始于
鄂陵而會于京口桑落州三百餘里而張須元九江圖
乃有三里五洲白蚌茵州之名五洲即蜺而三里即畝

也潯陽記則以為一鳥二白蚌三鳥土四嘉靡五畝六源七廩八提九菌源或作浮鳥土一作鳥白水經書疏莊子義等往往皆引為正晁百揆以為方俗所名於經無當桑落州今在宿松西南百餘里十道四番志云江自鄂陵分派為九于此合流謂之九江口又云潯陽江有八洲一沙二人三九江四葛五象六鳥七感八蚌曲折為九江洲與江洲潯陽中流分界東武林洲洲之下尾故程大昌謂荆境至潯陽以東即為揚州孔應所以

附會屬之別無古据安國言為九派未有其名至張僧
鑒張須元賈耽名而不同蓋出俗傳江何嘗九分哉逮
蔣之竒乃以九江為今洞庭宜亦有所見矣竊考漢志
東陵之間自有沈漸沅辰叙酉澧湘資九水皆合洞庭
東入于江山海經云洞庭之山是在九江中而博物誌
君山為洞庭山故張勃吳錄云岳之洞庭荆之九江也
若潯陽則為揚境非荆地矣水經注言九江在長沙國
下雋縣西北楚地乃今岳之巴陵洞庭在其西北則荆

之九江為洞庭審矣雖然秦漢以壽春置九江郡殊失所謂及英布為九江王而王莽更以豫章為九江郡劉歆以為湖陵九江入彭澤禹貢為辭也太史公云予登廬山觀禹迹九江口安得古之九江而觀之蓋自秦漢說者指潯陽為九江爾惠遠記廬山在潯陽南南濱宮亭北對九江而潯陽志九江在州西北二十五里皆率然之說爾太康地記以為湖漢元水入彭蠡者則又入贛之九水也益遼隔矣

又攷九江蔡註據水經以沈水漸水沅水辰水敘水酉水澧水資水湘水為九江仁山金氏辨之以為此九水惟澧水自入洞庭餘皆合沅水北流然禹貢東至于澧過九江則是澧又當在九江之外乃考朱子文集漢史江陵新志更定九江謂一曰瀟江二曰湘江三曰蒸江四曰資江五曰沅江六曰漸江七曰序江八曰辰江九曰酉江近世方麓王氏又以為九江為洞庭禹貢至于澧過九江澧水出今岳州慈利縣岳州即古巴陵郡江水

過澧州始經洞庭之口今荊州之水莫大於洞庭而爾雅十藪惟云楚有雲夢而不及洞庭周禮職方氏荊州其藪澤曰雲夢而亦不及洞庭戰國策載吳起言左洞庭右彭蠡又秦與荊戰大破之取洞庭五瀦則洞庭之名戰國時已有之然既言洞庭又言五瀦則是洞庭山之側有此五瀦分而為五亦可以證其未合而為一也想因九江同此入江故名九江後既瀦九而為五又會五而為一則九江遂皆入湖而洞庭之名始著九江五

瀦之名隱矣

曲江有三枚乘七發云觀于廣陵之曲江今蘇州也廣
東有曲江今韶州也司馬相如吊二世賦云臨曲江之
隄州即長安也按唐劉餗京師傳記云京師芙蓉園本
名曲江園隋文帝以名不正改之故杜子美詩云曲江
翠幙排銀榜又云春日潛行曲江曲七發所謂曲江弭
節也

碣石有二一在廣東南海口一在冀州北海口北碣石

在海中如河中砥柱當河入海之衝鎖中國水口真天
造也河旁地淪於海碣石遂去岸五百里其地今為遼
東西南小海其西即冀河入海故道山海關至薊州豐
潤一帶是也未有小海時遼東亦不屬兗者蓋須入山
海關從永平薊州方至兗遠矣若屬青州片帆可達故
唐虞時遼東今遼陽屬青遼西今廣寧屬冀自九河淪
海而兗地甚狹矣

黃河援神契黃河者水之伯上應天河酈道元水經注

河源出崑崙之墟山海經崑崙縱橫萬里高萬有一千
里有青白赤黑河環其墟其白水出東北陬屈向東南
流為中國河百里一小曲千里一大曲發源及中國大
率常然爾雅河出崑崙墟色白由此言之今之黃河所
謂白河也而物理論乃云河色黃赤何也又黃河九曲
其說出河圖絳象云河導崑崙山名地首上為權勢星
一曲也東流千里至規其山名地契上為距樓星二曲
也邠南千里至精石山名地肩上為別符星三曲也邠

南千里入隴首間抵龍門首名地根上為營室星四曲也南流千里抵龍首至卷重山名地咽上為卷舌星五曲也東流貫砥柱觸闕流山名地喉上為樞星以運七政六曲也西距卷重山千里東至雒會名地神上為紀星七曲也東流至大岨山名地肱上為輔星八曲也東流至絳水千里至大陸名地腹上為虛星九曲也元學士潘昂霄河源志黃河九折胡地有二折蓋乞兒馬出及必赤里也禹貢導河自積石以此參攷之絳象圖及

河源志與禹貢一一皆合

禹貢導河止自積石而漢使張騫持節通西域度玉門
見二水交流發蔥嶺趨于闐匯鹽澤伏流千里至積石
而再出唐薛元鼎使吐蕃訪河源得之于悶磨黎山皆
歷歲月涉艱難而其所得不過如此世之論河源者又
皆推本二家其說怪誕總其實皆非本真意者漢唐之
時外夷未盡臣伏而道路未盡通故其所往不無迂迴
艱阻不能直抵其處而究其極也元有天下薄海內外

人迹所及皆置驛傳使驛往來如行國中至元十七年
命都實為招討使佩金虎符往求河源都實既受命于
是歲至河州州之東六十里有寧河驛驛西南六十里
有山曰殺馬關林麓窮隘舉足寢高一日至其巔西去
愈高凡四閱月始抵河源是冬還報并圖其城傳位置
以報其後翰林學士潘昂霄從都實之弟濶濶出得其
說撰為河源志臨川朱思本又從八里吉思家得帝師
所藏梵字圖書而以華文譯之與昂霄所志互有詳略

今取二家之書考定其說有不同者附注于下按河源在吐蕃朶甘思西鄙有泉百餘泓沮洳散渙弗可逼視可方七八十里履高山下瞰燦若列星名火敦腦兒即

星宿海也

朱思本曰河源在中州西南直四川馬湖蠻部之正西二千餘里雲南麗江宣撫司之西

北一千五百餘里帝師撒思加地之西南二千餘里水從地湧出入井其井百餘東北流百餘里匯為大澤曰

星宿海

羣流奔轅近五七里匯二巨澤名阿剌腦兒自西

而東行一日迤邐東驚成川曰赤賓河又三日水西南來曰亦里出與赤賓合又四日水南來曰忽蘭又東南

來曰也里朮合流入赤賓其流寢大始曰黃河然水猶

清可涉

忽蘭河源出自南山其地大山峻嶺綿亘千里水流五百餘里注也里河也里出河源亦出自

南山西北流五百餘里與黃河合

又二日岐為九股曰也孫榦倫即九

度通也廣六七里可渡馬又五日水渾濁土人抱革囊

騎過之聚落糾木榦象舟傳髦革以濟僅容二人自是

兩山峽束廣可一里二里或半里其深叵測矣乃朶甘思

東北有大雪山名亦耳麻不莫刺其山最高譯言騰乞

里塔即崑崙也山腹至頂皆雪冬夏不消土人言遠年

成冰時六月見之自九股水至崑崙行二十日

自渾水東北流

一百餘里與懷里火禿河合懷里火禿河源自南山正北偏西流八百餘里與黃河合又東北流一百里即麻哈地又正北流一百里乃折而西北流二百餘里又折而正北流一百餘里又折西而東流過崑崙山下番名亦耳麻不刺其山高峻非常山麓綿亘五百餘里河隨山足東流過撒思家即濶濶提地

河行崑崙

南半日程地又四五日至濶即及濶提二地相屬又三

日至哈刺別里赤兒四達之衝也多寇盜有官兵鎮之

近北二日河水過之

河過濶提與亦西八思今河合亦西八思今河源自鐵豹嶺之北正

北流凡五百餘里而與黃河合

崑崙以西人簡少多處山南山皆穹峻

水溢散漫獸有髦牛野馬狼狽羴羊之類其東山益高地亦漸下岸狹隘有狐可一躍而越之處行五六日有

水西南來名納鄰哈刺即細黃河也

哈刺河自白狗嶺之北水西北流五

百里與黃河合

又二日水南來名乞兒馬出二水合流入河

自

刺河與黃河合正北流二百餘里過河以百站折而西北流經崑崙之北二百餘里與乞里馬出河合乞里馬出河源自威茂州之西北岷山之北水北流之古當州境正北流四百里折而西北流又五百餘里與黃河合

河水北行轉西流過崑崙北一向東北流又半月至貴

德州地曰必赤里始有州治官府州隸吐蕃等處宣慰

司司至河州又五日至積石州即禹貢積石又五日至

河州安鄉關一日至打羅坑又東北行一日至洮河水

南來入河

自乞里馬出河與黃河合又西北流與鵬撈河合鵬撈河源自鵬撈山之西北水正西流

七百餘里過禮塞塔失地與黃河合折而西北流三百餘里又折而東北流過西寧州貴德州馬嶺凡八百餘里與邈水合邈水源自青唐宿軍谷正東流五百餘里過三巴站與黃河合又東北流過土橋站古積石州來羌城廓州構米站界都城凡五百餘里過河州與野龐河合野龐河源自西傾山之北水東北流凡五百餘里與黃河合又東北流一百餘里過踏白城銀川站與湟水合湟河合湟水源自祁連山下正東流一千餘里注浩疊河浩疊河源自剛丹州之南剛丹山下水東南流七百餘里注湟水然後與黃河合又東北流一百餘里

與洮河合洮河源自羊撒嶺北東北
流過臨洮府凡八百餘里與黃河合

又一日至蘭州過

北卜渡至鳴沙河過應吉里州正東行至寧夏府南東
行即東勝州隸大同路自發源至漢地南北澗溪細流
旁貫莫知紀極山皆草石至積石方林木暢茂世言河
九折彼地有二折蓋乞兒馬出及貴德必赤里也

自洮水與

河合北流過達達地凡八百餘里過豐州西受降城折而
正東流過達達地古天德軍中受降城東受降城凡七
百餘里折而正南流過大同路雲內州東勝州與黑河
合黑河源自漁陽嶺之南水正西流凡五百餘里與黃
河合又正南流過保德州及興州境又過臨州凡一千
餘里與吃那河合吃那河源自古宥州東南流通陝西

省綏德州凡七百餘里與黃河合又南流三百餘里與延安河合延安河源自陝西蘆子關亂山中南流三百餘里過延安府折而正東流三百里與黃河合又南流三百里與汾河合汾河源自河東朔武州之南亂山中西南流過營州冀寧路汾州霍州晉寧路絳州又西流至龍門凡一千二百餘里始與黃河合又東南流二百里過河中府過潼關與太華山綿亘水勢不可復南乃折而東流大槩河源東北流所歷皆西蕃地至蘭州凡四千五百餘里始入中國又東北流過達達地凡二千五百餘里始入河東境內又南流至河中一千八百餘里通計九千餘里焉

祝穆方輿勝覽曰天下之大川以漢名者二班固謂之東漢西漢而黎州之漢水源于飛越嶺者不與焉固之

所謂東漢則禹貢之導漾自嶓冢山徑梁洋金房均襄
郢復至漢陽入江者也西漢則蘇代所謂漢中之甲徑
舟出于巴乘夏水下漢四日而至五渚者其源出于西
和州徼外徑階沔與嘉陵水合俗謂之西漢又徑大安
利劍果合與涪水合入于江

宋劉裕遣朱齡石伐蜀寇譙縱衆軍悉從外水取成都
臧僖從中水取廣漢老弱乘高艦從內水向黃虎史炤
通鑑釋文曰巴郡今之重慶正對二水口右則涪內水左則

蜀外水自渝上合州至綿州曰內水自渝上戎瀘至蜀
謂之外水按外水即岷江自重慶上叙州嘉定是也內
水即涪江自重慶上合州遂寧潼綿是也中水即沱江
自瀘州上富順資簡金堂漢州是也曰四川者則取岷
江沱江黑水白水四大川以為名爾

沈約宋書資江為
中水沿江為內水

五湖之說有二周禮揚州其浸五湖國語與我爭三江
五湖之利者非吳耶史河渠書於吳則通渠三江五湖
貨殖傳曰夫吳有三江五湖之利太史公自叙曰登姑

蘇望五湖此五湖者即具區也其派有五故曰五湖一名震澤一名笠澤張勃吳錄云五湖者太湖之別名以其周行五百里三萬六千頃故以五湖名義興記太湖射湖貴湖陽湖洮湖為五湖酈道元水經注謂長塘湖射湖貴湖上湖滬湖太湖為五張守節史記正義云茭湖游湖漢湖貢湖胥湖皆太湖東岸五灣為五湖虞翻云太湖有五道東通長洲松江南通安吉霅溪西通宜興荆溪北通晉陵滬湖西南通嘉興韭溪陸魯望云太湖

上稟咸池之氣一水而五名其名大同小異皆禹貢之所謂震澤也王勃文襟三江而帶五湖則總言南方之湖洞庭一也青草二也鄱陽三也彭蠡一名官亭湖即禹貢滙澤四也太湖五也

黑水諸儒之說不一程泰之辯之甚悉其一孔穎達援酈道元所釋水經有曰黑水出張掖雞山南流至燉煌過三危山南流入于海程尚書以為此說出於許叔重而增益以入南海者道元也蓋南海者交趾二廣之

海漢張掖者唐之甘州而燉煌者沙州也甘州之水皆入積石河河流竟東則其水已非南向况積石既在其南亦自無緣可以截河南過也程氏之言似為有據然水之在雍州今名黑水者有六若以為入積石河則是平涼及寧夏衛之黑水而非張掖之黑水也今輿地圖肅州有黑水南流去積石幾及三百里不與積石河相通此為禹貢之黑水無疑但其去南海遼遠而交南久棄無從考其入海之道咸通中樊綽宣慰安南親行西

南諸夷著為蠻書以載其所親見山川曰蠻水之南入于南海者凡四區江西珥河麗水瀾渚水皆羅絡西南諸夷西南入海其間有麗水者古黑水也但綽所案行者西南諸夷而未及於西北其所稱麗江程氏以為西行入驃始得至南海是得其下流而不知其上源之為何如乃程又不取其所稱麗水而指其所稱西珥河謂與漢志榆葉澤相貫榆葉漸漬成黑又引古黑水祠在益州者為証不知此黑水乃成都安縣南之黑水而非

禹貢之黑水也至元金仁山又謂西南諸水合而為瀘水夷人謂黑為瀘瀘水即黑水也經過雲南但名瀘水至交趾又名歸化水廣處如江東南入海而海道圖自名黑水口按四川行都司城南有瀘山即瀘水所出今雍州多黑水尚不知的在何處而乃欲以瀘為黑又考交趾海口並無所謂黑水口則金氏之言尤不足信也禹貢道皆曰浮于惟冀州無貢道止書島夷皮服夾石碣石入于河蓋島與碣石字相聯書知為海夷貢道

若梁州厥貢惟璆鐵銀鏤砮磬熊羆狐狸織皮西傾因
桓是來當作一節浮于潛四句是一節梁州是今四川
兼有陝西漢中金沔鞏昌西和成縣秦州湖廣施州等
地若貢物俱從西傾而來是東南至西北登舟矣西傾
因桓是來止言織皮出處與所由來也潛亦非一梁州
三十六江皆是隨處登舟都到沔車行入渭又舟行也
雍州厥貢惟球琳琅玕織皮崑崙析支渠搜西戎即叙
當為一條浮于積石四句為一條西傾在今臨洮府一

云洮即桓西戎即叙猶青州厥貢條中有萊夷作牧也
夏書兗水東流為濟入于河溢為滎又東出陶丘北此
伯禹所知也

歷古地書皆知濟自河北溢縣入河自河南滎陽而溢

兗濟二郡正

以是名濟源縣在河東濟南濟北濟陽濟陰皆在河南
自杜預謂濟繇滎陽東過魯之西至樂安入海兗出王
屋入河始鑿為二而杜佑李吉甫樂史竇革鄭樵輩遽
援後志謂濟自莽末旱塞不復截河南度而以水經依
取禹貢為疏故唐高宗問許敬宗禹浮濟漂達于河何

今濟漯斷不相屬對曰充濟自溫入河汝地南出為滎

澤又汝而出曹濮之間汝水從南入之故書又言浮汶

達濟不言合漯漯自東武陽至千乘入河也

漯自濟派至東武陽

入河今莘縣北此水入河非濟水入河也

敬宗蓋亦本孔與河並驅而截河

溢出之意不知其時無復滎水汨出滎口者

滎陽水受河流石門

渭之滎口○滎澤在

今滎澤縣北四十里謂濟南諸名為出不審是一蔽也

佑說河南之濟使禹所命或以性同或一時衆流湊泛
濟適溢從河南以出而名又奚必汝流之說然禹必不

以一時暫溢之名移疑後世夫水之所出自以不同固有入而不合行而復出者昔郭緣之於河上源遇書生問之何知濟與河上源通生曰洛水淬劍正與河水上源不異物之不同猶鉛錫也北濟既入于河性與河別不能合混滲漉入地狀行達滎陽而遂溢為滎爾今之厯下等處發地悉是流水濟所過也東阿之井正濟所溢故今阿膠止濁住吐下膈而踈痰以濟之性趨下清而下重故治淤濁逆上之病以今油水固不同情九夏

之辰冷熱之風亦各為隧豈為必無水過水哉涇渭分
曹南零會地此理不少鄭樵謂山過山則分水過水則
合世無山過山水過水之理謂漢入于江其文止此下
有脫文充入于河其文亦止于此而溢為滎之上當更
有道流水數句說經不通不以為脫必以為誤此書生
之篤疾也林之奇以為漢入江濟入河皆合而流大禹
導水自此開以支引之故猶蒙上之名亦以淺鄙測聖
人者庭州霸水金鐵皆漏

庭州漏水滴滴以手及金鐵
器承之皆漏惟秋葉則否拘

夷山中有流水下如飴亦然服之髦毛落而仙曰脫溺
去屯煌二萬里道安西域記云石駝溺其國有婆羅門
守鄺延之河日夜流脂鄺延境內有石油舊說高奴縣
出脂水即此水際河石間與泉
雜出以雉尾裹之乃采入缶似淳漆然之如麻烟甚濃
重沈括取掃為墨松脂不及所謂延川石液者石炭烟
亦大黑人衣延川詩所謂二郎山下雪紛紛石烟多似洛陽塵弱水溺毛黑溪玄黠悉
唐制角西海島間出如脂而黑金鐵承皆漆去惟角可
貯南人以塗木上象至輒不去崑崙以塗身即
乘之如婆羅門有昨茶怯水出山石坎中七
色或冷或熱能消金石草木手探亦
家畜腐取以駝骨
石人守之畔怯腐手蓋亦謂之無哉

孔明出師表五月渡瀘今以為瀘州非也瀘州古之江

陽而瀘水乃今之金沙江亦曰黑水其水色黑故以瀘
名之耳沈黎古志孔明南征由今黎州路黎州四百餘
里至兩林蠻自兩林南瑟瑟部三程至嵩州十程至瀘
水瀘水四程至弄棟即姚州也今之金沙江在滇蜀之
交一在武定府之江驛一在姚安之左却據沈黎志孔
明所渡當是今之左却也瑟瑟一作風瑟瑟兩林今之邛
部長官司也

荊州府志載夷陵州有浣紗河其說云昔伍子胥奔吳

道遇浣紗女即其地也其水色班白若浣紗之色後人立子胥廟於此按吳越春秋伍員初逃楚難聞太子建在宋奔往就之既而奔鄭會鄭人殺建乃與建子勝奔吳越昭關至江漁父渡之遂行入吳疾於中道乞食漂陽會女子繫綿於瀨水之上簞有飯女子長跪而與之子胥已餐而去顧謂女子曰掩夫人之壺漿無令其露女子嘆曰嗟呼妾獨與母居三十年自守貞明不顧從適何宜餽飯與丈夫虧越禮儀妾不忍也乃自投於瀨

水而死後員入郢而還過潁陽瀨水之上欲報女子以
百金而不知其家乃投金水中而去又按張勃史記註
子胥乞食在丹陽潁陽縣丹陽為今應天府潁陽其屬
邑也邑有投金瀨緣伍員投金而得名唐時立貞女祠
其上李太白為之記

陳陶詩可憐無定河邊骨猶是春閨夢裡人按無定河
在青潤縣東六十里南入黃河一名奢延水又名銀水
輿地記唐立銀州東北有無定河即圉水也後人因潰

沙急流深淺無定故更今名又唐陳祐詩無定河邊暮
笛聲赫連臺畔旅人情函關歸路千餘里一夕秋風白
髮生

韓文步有新船不知者改為涉朱子考異已著其謬蓋
南方謂水際曰步音義與浦通孔戣墓志蕃舶至步有
下碇稅即以韓文證韓文可也柳子厚鐵鑪步志云江
之許凡舟可縻而上下曰步水經贛水西岸有盤石曰石
頭津步之處也又曰東北逕王步蓋齊王之渚步也又

云鸛鵒洲對岸有炭步今湖南有縣名城步青箱雜記
嶺南謂村市曰墟水津曰步曾步即漁人施罾處也張
勃吳錄地名有龜步魚步揚州有瓜步任昉述異記上
虞縣有石駝步羅含湘中記有靈妃步金陵圖志有邀
笛步王徽之邀桓伊吹笛處溫庭筠詩妾住金陵步門
前朱雀航樹萱錄載臺城故妓詩曰那看回首處江步
野棠飛東坡詩蕭然三家步橫此萬斛舟元成原常有
寄紫步劉子彬詩云紫步于今無士馬滄溟何處有神

仙字又作埤今人呼船僧曰埤頭律文私充牙行埤頭
東海中有弱水不勝鴻毛至則必溺故名又西海中亦
有弱水西海今西寧衛西三百里弱水在甘州之西秦
乞伏熾磐討吐谷渾覓地于弱水南大破之覓地降署
為弱水護軍又道經廣野山在北海弱水中

洪水滔天鯀竊帝之息壤以堙洪水

山海經云帝怒令祝融殺之羽山

息生

之土長而不窮

如出入息息肉息錢息婦云者

故有息石

高子勉息石詩字在江陵莊嚴寺或

云強

漢元帝時臨滁地涌六里崇二丈所哀帝之世無

鹽危山土起覆章如馬道狀蓋息壤也江陵之壤鑿鎮

水旱

江陵圖經引別錄云子城南門地隆起如伏牛馬去之一夕輒復如故在昔傳為息壤牛馬騰踐或

死

昔高從誨鎮渚宮出經其處

萬勝門外

問書記孫光憲對

以伯禹治水自岷至荆定彼泉源之穴慮萬世下有或

泛溢爰以石屋鎮之蓋本之冥洪錄裴相歐獻之事也

元和初裴宙鎮荆掘之六尺得一石規模樓櫓悉倣荆城其中空徑六尺八寸甚工緻命徙之藩籬間是春淫雨四月不止潦漲莫過人抱為魚之憂會歐獻乘居楚山馳問之對以事迫鑿石弗及令陶範為江陵城內廣六尺八寸樓堞門閤無少差于南門外八十步掘深六尺埋之當止宙始驚嘆昔人所填從之既瘞祭之夕復

隆起嶽乃洛中道士博學多聞亦見江陵志

王子融修臧丙之事雷雨驟集

爰屋而記之貽救留者焉

慶歷甲申尚書郎王子融涖渚宮自春不雨遍走羣祀五

月壬申與郡僚及此以今地無復隆起而石屋簷且露請掘取驗雖召水沴亦足為快因具畚鍤實土數百石以備俟旦從事是夕雷雨大至遠近沾洽亟以馨俎薦答醫博士張若水者年逾七十因言兒時見臧大諫丙嘗以久旱發之數尺巨石如屋四面為柱為牖其南隱出門閤之象百夫莫動乃廢以巨索率水呪二百蹄出之大雨而止未及窮其石城者因覆以屋後更為蔽累壇繪為風雷之象陳堯佐不宜之易以龍神皇祐二年子融致仕始為記

蘇軾言其屢應然矣

息壤詩序云俾曹呂刻真之旁有石記謂

不可犯畚鍤所及輒復如故又頗致雷雨歲旱屢發有應

柳子所言龍興寺地天地

之間自多有此

記是永州云負甕而起者尺有五寸夷之復高歸者皆死云

然鮓以

埋水殛禹復用之彼以障汨而此以填後禍也

淮南子云禹以

息壤埋洪水以生土封之意有後泄也

岑參熱海行云蒸沙爍石然虜雲沸浪炎波煎漢月按
玄奘西域記云凌山蔥嶺北隅坎雪積凌春夏不解懸
釜而炊席冰而寢七日出山有一清池亦曰熱海以其
對凌山不凍故得此名也

江左今有莫愁湖在西城南按古樂府有莫愁樂石城

樂唐書樂志曰石城有女子名莫愁善歌謠石城樂第
二歌云陽春百花生摘挿環髻前挽指躡忘愁相與及
盛年莫愁樂云莫愁在何處莫愁石城西艇子打兩漿
催送莫愁來尚未詳也莫愁盧家女子善歌唱嘗入楚
宮李商隱詩如何四紀為天子不及盧家有莫愁是也
莫愁村今在承天府漢江西石城在州西北晉羊祜所
建鄭谷詩石城昔為莫愁鄉莫愁魂散石城荒江人依
舊掉舴艋江岸還飛雙死央王橫詩村近莫愁連竹塢

人歌楚些下蘋洲又沈佺期詩盧家少婦鬱金香即此也按通考載梁武帝詩洛陽女兒名莫愁云莫愁盧家女洛陽人則莫愁又有兩人矣

吳泉即虞淵見河圖絳象云邠之隘上為扶桑日所升宣陸之阻上為吳泉月所登此偽書也虞綽逃難易姓名作吳卓唐高祖諱淵後易作泉詩云酣歌一夜送泉明是也

湖州有餘英溪餘不溪不今秋韻作方鳩切非也當作

虞韻風無切本作拊說文鄂足也草木房為拊一曰華
下萼通作不詩棠棣之華鄂不韡韡鄭云承華者鄂不
當作拊鄂足也即今言花蒂也此地有梅溪苕溪其泥
相通故曰餘英餘不其義可見矣若作方鳩切則本注
說文云不鳥飛上翔不下來與溪水全不相干涉也

易澤中有火素問云澤中有陽燄如火烟騰騰而起于
水面者是也蓋澤有陽燄乃山氣通澤山有陰靄乃澤
氣通山木華海賦陰火潛然唐顧况使新羅詩陰火暝

潛燒是也東坡遊金山寺詩云是時江月初生魄二更
月落天深黑江心似有炬火明飛燄照山栖鳥驚悵然
歸臥心莫識非鬼非仙竟何物注引物類相感志山林
藪澤晦明之夜則野火生焉散布如人秉燭其色青異
乎人火按拾遺記東海有浮玉山山下有穴穴中有大
水蕩瀟火不滅為陰火正此類也

禮運地出醴泉注王者政平醴泉湧出十洲記瀛洲有
玉膏山出泉如酒味名為玉酒飲數升輒醉令人長生

應劭漢官儀曰酒泉城下有金泉泉味如酒故曰酒泉
述異記海上十洲一曰瀛洲有青丘翠水地生玉酒飲
之長生白孔六帖南昌國有酒山山有泉其味如酒飲
之甚美醉則經月不醒方輿記曰漢宣帝聞谷口縣泉
味如酒故以醴泉名縣醴泉縣志泉在縣東南三十里
周圍數十步深不可測圖經曰醴泉在扶風鄉唐貞觀
中復湧出其味如醴飲之可以愈疾又漢光武中元元
年明帝永平十一年隋開皇二年唐天寶三年宋大中

祥符元年熙寧元年政和五年並有醴泉出

野語曰邵康節曰世有溫泉而無寒火昭德晁氏解云
陰能順陽而陽不能順陰也水為火爨則沸而熟物火
為水沃則滅矣晉紀瞻舉秀才陸機策之曰陰陽不調
則大數不得不否一氣偏廢則萬物不能獨成今有溫
泉而無寒火其故何也白虎殿諸儒講論班固纂為白
虎通五行篇亦曰有溫水無寒火然今湯泉往往有之
如驪山尉氏駱谷汝水黃山佛迹匡廬閬中等處皆表

表在人耳目坡詩云自憐耳目隘未測陽陰故鬱攸火山烈膏沸湯泉注安能長魚鱉僅可燂狐兔朱氏晦庵詩云誰然丹黃燄燄此玉池水蓋謂溫泉之下必有硫黃礬石故耳獨未見所謂寒火按西京雜記載董仲舒曰水極陰而有溫泉火至陽而有涼燄又抱朴子曰水性純冷而有溫谷之湯泉火體宜熾而有蕭丘之寒燄又劉子從化篇曰水性宜冷而有華陽溫泉猶曰泉冷冷者多也火性宜熱而有蕭丘寒燄猶曰火熱熱者多

也然則寒火亦有之矣特以耳目所未及故以為無耳
水之異者句容縣半湯湖其水同一壑而半冷半熱熱
可淪雞皆有魚魚交入輒死石陽縣有井水半青半黃
黃者如灰汁取作粥飲悉作金色氣甚芬馥崇寧一大
井以片石開二竅幕其上一竅汲以造錫一竅汲以為
染若易竅汲之皆不能成其用恒山有雙龍泉相去僅
丈許而一甚甘一甚苦壽州有咄泉人至其旁大呌則
大湧小呌則小湧咄之則湧彌甚無為州有笑泉湧出

石底人有笑聲則泉益滾沸西寧衛有泉聞人足音即沸

司馬相如上林賦叙上林諸水曰丹水紫淵灞滹沱涇渭八川分流相背而異態灝沍潢漾東注太湖八川自入大河大河去太湖數千里中間隔太山及淮濟大河何緣與太湖相涉郭璞江賦云注五湖以漫漭灌三江而滿沛墨子曰禹治天下南為江漢淮汝東流注之五湖孔安國曰自彭蠡江分為三入于震澤從為北江而入

于海此皆未嘗詳考地理江漢至五湖自隔山江乃遶
出五湖之下流徑入于海何緣入于五湖淮汝徑自徐
州入海全無交涉禹貢云彭蠡既豬陽鳥攸居三江既
入震澤底定以對文言則彭蠡水之所豬三江水之所
入非入于震澤也震澤上源皆山環之了無入川震澤
之委乃多大川亦莫知孰為三江也

水以漳名洛名者最多今略舉數處趙晉之間有清漳
濁漳當陽有漳水潞上有漳水鄆郡有漳江漳州有漳

浦亳州有漳水安州有漳水洛中有洛水北地郡有洛水沙縣有洛水此槩舉一二耳其詳不能具載考其義乃清濁相揉者為漳章者文也別也漳謂兩物相合有文章且可別也清漳濁漳合于上黨當陽即沮漳合流潏上即漳潏合流鄆郡即西江合流毫漳渦合流雲夢則漳鄆合流此數處皆清濁合流色理如蟠螭數十里方混洛與洛同義謂水自上而下投流處也

人有疑水肥石墨事者按地理志言高奴縣洧水上有


肥可用之博物志言酒泉南壽縣南山出泉水大如管注地為溝水有肥如肉汁取著器中始黃後黑如凝膏然極明與膏無異膏車與水碓甚佳北方謂之石漆又云水肥水經注銅雀臺北曰冰井臺高八丈上有冰室室有數井深十五丈藏冰及石墨焉石墨可書又然之難盡亦謂之石炭陸士龍貽兄書三臺上曹公藏石墨數十萬斤云燒此消後可用然烟中人不知兄頗見之今送二螺即此物也

唐六典述五行有命祿驛馬湓河之目按沈存中夢溪筆談曰余在鄜延見安南行營諸將閱兵馬籍有稱過范河損失問其何謂范河乃越人謂淖沙為范河北人謂之活沙人馬履之百步之外皆動瀕瀕然如人行幙上其下足處雖甚堅若遇其一陷則人馬駝車應時皆沒至有數百人平陷無孑遺者或謂此即流沙也又謂沙隨風流謂之流沙湓字書亦作湓

蒲濫反

按古文湓深

泥也因知術書有湓河者蓋謂陷運如今之空亡也



說畧卷三